



978152

謙

品

詩

集

受業劉釗署簽



首初于廣鼎心  
卷緒三十一至

序

老夫故廬守也王徵君育泉廬之豪久從余游今春視師肥上君率長子尙辰來見吁吾去廬將二十年蒿然見君齒髮未衰心幸故人固無恙也尙辰伉爽有父風上書不下萬言洞中款卻諮詢時政口津津若懸河指利弊得失毋隱賓僚屬目余又幸子服之世有子也既而進詩數帙求序軍務方殷余不暇作吟詠事且深不願後生輩務虛名損實用也及閱諸作大抵憂時嫉俗多忠憤語知其平日抱負尙不屑屑以詞章見也古人軍中何嘗廢詩尙辰性敏力學少館余家貢文於湯海秋侍御詫爲清才今觀其詩想其志趣殆非終下人者余老不及見行矣勉之咸豐癸丑三月東阿周天爵

謙齋詩序

歲壬子夏仲余與肥上王君育泉同應制科試其長君伯垣隨侍皖城伯垣丰姿俊邁才氣橫溢喜交天下士人以奇士目之所著拳石山房詩集包孕古今不名一體擬贈一序逡巡者久之育泉家有小輞川別墅據逍遙津上名士觴詠無虛日余與育泉父子恨相見之晚也倏忽經年粵賊由岳州破武昌陷九江直擣安慶金陵重鎮不旬日已爲賊有自是而滁鳳而潁毫江淮驛騷國家承平二百餘年功令以時文試帖取士士亦終身從事於此不



復知有經濟學其他則賞郎已耳文恬武嬉習常蹈故一  
經板蕩萬事瓦裂卽平居自命爲豪士鴻文鉅製著作等  
身亦且惴惴焉無以爲主帖耳而交受其病 列聖深

仁 天子憂勤倍於曩昔凡有血氣胥知感奮吾廬據  
入皖形勝節使周公奏改省會予時來廬得與育泉父子  
續相見且悲且喜長夏無事育泉招故舊泛舟逍遙津唱  
采蓮歌一闋洗盞柳陰下縱談時事怒目切齒日暮倦歸  
用工部韻得詩十首屬伯垣和之嗟乎余旣歎伯垣之才  
又竒其志鳳凰上擊九千里絕雲霓負蒼天足亂浮雲斥  
鷄從而擬其後世有知伯垣者又豈不足以建勛名削禍  
丑六月廬江吳廷香

謙齋詩序

二

亂哉僅以詩鳴隘矣雖然伯垣之詩伯垣之才所見端固  
余所疇昔期許而不能已者伯垣有志勉之而已咸豐癸  
詞章之爲技至小顧其壽也恒獨永古之工於是者大都  
過琛其所得往往扁匿幽阻出於人跡意想之外冥然若  
無所願於世者迺無端撥於火穴於山網於水掘於溷中  
壞壁破冢以布之大書深刻以誦之自周秦以來著於錄  
者蓋班班然吾友王君伯垣少喜爲詩往余家城中見其  
所爲稿旁行塗乙多可愛者今年余辟兵湖干君作日益  
多因編次前後所爲總錄成冊將匣而瘞之而徵文於余



君於廬州爲著姓方明之季盜蜂起廬州地四衝兵火彌  
歲蕩爲邱墟自君家先黃州公與通政公後先繫籍於朝  
簪紱之盛昇平文物之富涵濡積累垂二百餘年至君之  
尊人育泉徵君保世益大園廬池館鼎彝圖史一切瓌麗  
可好之物嘗甲於郡中今江淮屢構兵安慶一再失守郡  
中人焦然捆載以遷者十去其七君少年獨躑躅空城中  
朝夕把一編酸吟洩咨不忍去手蓋君之自珍所得將錄  
而藏之與余愛君之詩流連太息揮涕泣而叙之者皆世  
所謂迂狂謬悠可笑人也是則重可悲也夫咸豐三年初  
冬同里徐子荅敘

謙齋詩序

三

蓋聞子美抱匡時之畧寓於詩歌樂天多諷事之詞播諸  
樂府本風人之遺旨作變徵之新聲詩兼史才詞必已出  
盛於當時傳於後世其以此歟雖然咏草堂之什慨當以  
慷誦秦中之吟婉而多諷未必見之實用要皆託諸空言  
至於身作詩人才長用世騷壇韻事看織錦於天孫戎馬  
書生效請纓於終子其才華也如彼其英俊也如此則嘗  
於王君謙齋見之矣謙齋琅玕望族南豫名家少負雋才  
世稱宿學鯉庭垂訓奉堂上爲名師鴻案聯吟結閨中之  
韻友房標卷石學衍青箱津啟遙園依綠水方且謂茂  
林修禊追盛述於永和別墅題詩繼高踪於摩詰旣而湖



湘告急桐皖戒嚴鶴唳警於江濱狼烽燭於淮水廬郡毗  
連吳楚襟帶江湖塢築濡湏舊是必爭之地闕開峽石素  
稱扼要之區謙齋懷抱杞憂情殷梓里入深源幕時陳逸  
少之書登武昌樓常有仲宣之感無如知音難遇古調獨  
彈濁酒素琴自寫牢騷旅况狂歌拔劍誰知磊落奇才遣  
逸興於湖山寄情懷於風月春風楊柳時寫相思秋水芙  
蓉爭傳麗句歌題畫扇憶南部之烟花句摘香奩仿西崑  
之酬唱又未嘗不放浪不羈而風流自賞也然而具絲桐  
之質必遇中郎負騏驎之能終逢伯樂筵前顧曲得公瑾  
爲賞音筆底生花遇文通爲知己以一時之名士親當代

謙齋詩序

之偉人志切酬恩力圖報國黃巾宵遁殲强寇於冶溪赤  
幟朝懸募鄉兵於肥曲謙齋曾隨周文忠  
勦匪江忠烈守城 廼磨盾墨用作  
鏡歌狹巷短兵共賞沈郎雄快天山三箭爲銘唐將助勞  
孰意波寒潁水夜隕將星峯冷蜀山霜枯戰骨謙齋悲深  
故吏哀北門人懷耆老於襄陽篇名感舊弔孤忠於楚澤  
詩賦招魂夫固有易水悲歌難方激烈子山哀豔祇益酸  
辛者矣加以田園荒廢骨肉流離豺狼嘯聚於道塗鸞鳳  
飢棲於枳棘莫不長歌當哭窮愁著書然而英雄立志有  
屈必伸杰士懷才經危益顯旣脫身於虎穴旋獻策於龍  
驤義在乞師爰灑包胥之淚謀工內間如登子反之牀縱



其事未成而其心頗壯

謙齋受和軍門密諭招降僞帥何內應官兵失期僅有派河之捷何

況出奇制勝足振軍威斬將搃旗已寒賊膽哉蓋謙齋幼

卽權竒長遭喪亂少年諷咏無非弄月吟風壯歲謳歌牛

屬憂時感事洵乎詞章之變化實隨境遇爲轉移也斯時

皖省軍興已逾數載每傷民瘼屢屢宸衷於是起郭令

於閔曹兵權再掌召魏公於邊鄙將印重頒

謂都統勝保於太僕袁公

再取道豫南長驅以進收功皖北轉戰而前剿撫兼施恩

威並濟素聞淮甸舊舉義旗樓堞天成築壘據仇池之險

困倉雲積屯糧同魯肅之謀謙齋誼屬知文才長游說相

如詞賦可諭三巴陸賈文章能通百粵處囊自薦昔來細

### 謙齋詩序

五

柳之營杖策相招親下連珠之砦

謙齋奉二帥命在招沛霖以眾來歸韓公

兩使冀北庭奏輸誠馬援再往河西竇融請吏儒生而兼

武畧文士而著竒勳宜乎幕府酬庸薦章叠上西蜀安而

獻策之方平晉秩蔡州定而行軍之司馬遷官從此大展

謀猷力追雅正登高作賦陋他五字參軍被褐而談勝於

十部從事永靖青絲白馬全憑嚇楚之書重看匹帛叢花

用上平淮之頌咸豐九年季春甘泉毛鳳枝予林敘

古以合肥爲春壽枝境而非也龍舒以北輔弼行龍二百

餘里壽春其腹明陵其臍此其胸膈處也故氣體雄健磅

礪而所產代有偉人歲壬戌夏仲予奉調守廬亟求有以



進予於道者適葉次元魏翼堂鄧松喬趙梧岡徐又香王謙齋諸君子先後見葉魏趙諸君俱應對惟謹謙齋論古今事無少顧忌心壯之揖之退知素以風名意以爲夫夫也其豪放不羈者也居數月閱前後所著詩集若干卷天下士之不敢輕相也顧如是耶江忠烈公殉節廬城也陳岱雲太守鄒叔績司馬與焉忠烈與岱雲俱予同譜友叔績亦兄事者予自守廬來時夢中依依如疇昔讀謙齋挽忠烈及岱雲叔績諸詩真令我痛絕也且夫拔湮鬱起瘡痍捍災患守土者之事也予尸位十有一月矣無寸澤及民去冬賊竄居巢僅千數勢甚憊竟聽其由犬而虎幾至

謙齋詩序

六

城下而不能爲我民出之死地又不能與我民同死謙齋數竒窮不能出所作以問世予亦窮且拙不能使天下欲讀謙齋詩者而一置案頭此則其所大憾者也客問謙齋之詩究何如嗟乎沈鬱近杜豪肆近蘇尙何言哉且天籟之生也粗細畢具風水之相薄也清濁同歸玉不以瑕而掩瑜衣不因垢而棄錦讀謙齋詩者可無事他求矣况由是而進焉液物爲金液金爲氣化形而返神醉不以鼻飲夢不以趾捉或者風而進於道且有以進予於道平書此以告謙齋及魏趙諸君並以告產斯土者合肥非壽春枝境也同治二年仲春楚南唐景皋拜譔



漢人有言安其所習毀所不見余謂非獨治經然也今世之士方童穉時已視富貴利達如飢渴之於飲食而其所挾以求當於世則惟聲調對偶之詩與排比帖括之文而國之休戚民之死生漠不以措意一旦獲所冀出與春秋試之文衡則將以是進退天下士卽退居一鄉亦必執此意以別擇其交游而繩削其子若弟設有以李杜韓歐之業進者彼徒見與所習者之不類而於憂時感事之作則愈病其有妨於進取反詆以爲狂怪不祥固其宜也合肥王君謙齋好學而能詩尤留意當世事顧屢試不得志於有司數佐軍幕有所計畫輒擯不見用其鄉人皆目爲風

謙齋詩序

七

漢謙齋顧益自喜稠人廣坐中遇事可否及官吏賢不肖言侃侃無所回撓聞者或掩耳走謙齋愈益疾言之嗟乎以謙齋之才少斂其芒角而從事於世俗之爲何遽居衆人後然猶幸而不遇不爲世忌嫉第迂笑之而已王生與益次公書云方今用事之人皆明習法令言足以飾君之辭文足以成君之過設謙齋得志於世世所以待之者豈僅空言相詆笑已哉然則謙齋惟益治其詩而勿復與世上下其議論卽詩果至乎古人且不爲世所輕重不惟免於嫉且忌並向之詆笑者亦久而相忘焉吾將與謙齋相視而笑而各言其千金之敝帚焉其可也代州馮志沂



嗟乎余壹不知夫造物之弄人也。惟其才顧厄其遇而不使大展其用也。用世之才有真有僞。傳世之才有真無僞。遇又何能爲才厄哉。有人焉負昂藏磊落之姿。懷憤世嫉俗之志。遭鄉國亂離之日。值九死一生之時。在常人處此鮮不顛且仆者。而乃履險如夷。破涕爲笑。狎虎狼猶豚犬。玩戈矛等草芥。全身以出。機變過人。侍親從戎。爲民捍患。屢受薄賞。旋復高蹈傲睨。公卿獨行。其是鄉之人。遂呼曰風漢。且目爲三怪之一。而其勃勃不可遏之氣。懍懍不敢犯之色。侃侃不能盡之言。則悉於歌詠中發之。若我謙齋。遇彌厄而才彌雄。天固末如之何也。昔周文忠公稱尊甫

謙齋詩序

八

育泉丈爲廬之豪。謙齋繼丈而豪。三十年前。予初至卷石山房。豪其詩與訂金石交。旣而廬陷於賊。豪如故。賊平復。應秋試。試輒報罷。豪如故。予在揚州八年。時來訪予。飲酒賦詩。淮軍諸帥率延之上座。豪仍如故。今者予罷官。僑寓揚州。謙齋冒風雪。擎舟而至。夜將半。不問它事。索蜀吟草大聲讀之。讀竟。便去。嗚呼。謙齋之豪。洵一時無兩也。而其心則不自滿。假每成一詩稿。必數易。友朋辯難。擇善以從。長白果敏。公曩撫吾皖。取其詩卷。弄諸篋笥。將爲付梓。亡何果敏薨於西陲。詩卷存否不可知。而謙齋坐蝨隱庵。背記手錄。十得七八。編次成集。就質於予。繙帙諷誦。妄以已



意爲之甲乙曰謙齋傳已謙齋之詩以七律爲最騰踔慄  
悍力追少陵五律得右丞家法古體及截句亦皆風骨道  
上異乎凡響謙齋之才雖不得用而謙齋之詩則自有其  
不朽者在也矧年未六十由此進而益上凝神渺慮直造  
乎清微澹遠之境予又烏能測所歸宿耶光緒庚辰中春  
定遠方濬頤

廬子國有三怪人其一王君謙齋也自予弱冠卽交謙齋  
迄於今餘三十年其容貌予見之熟語言予聆之深文章  
品詣又予所折服而時時稱道不置取譬古賢淮陰國士  
北海奇男子也曷爲竟以怪名間嘗訊諸客客曰吾以子

謙齋詩序

九

爲異之問獨奈何一怪是問哉予固悉夫謙齋之容貌語  
言文章品詣者也請先以謙齋之容貌言之眉橫秀峯而  
不爲利鋒目凝紺瞳而不作細蜂鼻呼吸雌雄而不束馬  
籠口臧否異同而不能取通且夫一語一言澈始澈終三  
旨宅揆模稜得公獻諛不嫌其多貢直有時而窮今謙齋  
見事必辯遇惡則攻計是非而不計利害求遠效而不求  
近功抵掌公卿問奮身戈鋌中鄙蘇秦以說客羞張湯之  
詐忠人方論其時務之不達而君乃賞其文章之更工予  
亦知夫當世文章乎前茅唐胡後勁劉熊則倣房行講習  
童蒙玉堂天上稱歎於歐陽六一翰林畫匠輕侮於姚涑



楊維驄而謙齋放情山水寄傲屐筇視科名若土苴夷帖括爲蒿蓬軒裳珪組不足動其念詩騷詞賦則寢饋於厥胸爲之於舉世不爲之日而尙曰沐姬孔之餘澤追鄭賈之遺風吾方幸三怪之已死其二不意子之見怪不怪而反以謙齋爲可法可宗方子憮然拈須而笑昂頭而噫長揖而謝曰毋多言予愈有以知謙齋矣客遂巡退亟取謙齋詩讀之如太華三峯聳勢爭竒如黃河水從空來汪洋恣肆末由揣測如疾雷怒電驚憚蛟蛇蝮蝮而無所逃避如張樂洞庭之野白虎蒼龍鼓瑟吹簾度曲未終雲飄飄而雪霏霏令人目奪神賊蓋予子以前東臯遣興輞川閒

謙齋詩序

十

居實淵源於家學嗣則流離家室出入荆榛或感弔忠良或刺譏貪懦長歌當哭癡憂以痒方駕杜陵無忝詩史迨中興甲子以還居田園課子姪香墩笛浦極耕烟釣月之歡魏晉名流真覺去人不遠謙齋原不厯以詩傳讀其詩而謙齋之可傳益信焉光緒己卯秋予陳情乞養兵燹無家僑寓寶應謙齋聞予還欣然買舟來訪侃膝暢談情逾曩昔而吾兩人亦皆白首矣瀕行屬余釐訂所作并委以序因記向與客所道者書而歸之嗚呼三十年來一彈指頃耳作詩者其有憂患歟庚辰中春定遠方濬師序於退

一步齋



士有自邁孤往少異世軌負蕨魁之質抗清峻之標則嘲  
誚騰於密邇譏誹錯於塗路辟之非族跡若軫戾矣况乃  
中富機軸氣暢文藻鄒衍竒士多談天之言東方異人有  
玩世之態若我王先生也先生童齒好學岐嶷有志縱筆  
直遂以文是嬉濶霍之區實曰雄俊侔乎王已旣而狼豕  
滿地荆榛蠹天堅城瀕危老弱走避先生登高一呼豪杰  
四起尺書非微足當十萬之師醜虜吾掌遂成七禽之捷  
其功勒乎金石其才張乎風雲頌其歌詩可謂雄哉烟塵  
旣靖山水猶昔建業佳麗之地廣陵綺羅之鄉同安險阻  
之域吳越繁豔之會轍迹所歷花鳥改色峰岫延賞命中

謙齋詩序

十一

車以敖冠佩弗飾惟諸侯是主於是玩物言志觸時述情  
或絕險以鑿遂或競妍以殊媚或綜悲喜之慮或騁暇適  
之懷興致旣曠氣宇益振目之大成甯曰過情然而李廣  
數竒未膺封侯之賞韓侯功高廼與屠沽爲伍磅礴之氣  
結爲輪困盤錯之感嬰乎胸次匪嗜慢罵聊此滑稽走則  
謂阮生非狂厥由憂世屈子工怨終能愛君謂予不信請  
誦公詩霰霰之喙亦可以少箝哉武進晚學管樂跋

昔昌翰游京師嘗與尚邑董嘯庵戴蓉舟論皖中人士必  
首舉王君謙齋徐君毅甫皆合肥詩人也嗣昌翰客中州  
於皖人士不相聞者近三十年洎解組歸皖訪耆舊則徐



君已早逝而王君年逾六十與之習者謂其詩益富而豪邁猶昔適仁和譚仲修大令權合肥遂寓書問訛仲修來參開府則挾謙齋詩集以至日謂謙齋固亦知我三十年前也夫以壯少相傾慕之人投老未與之面一旦讀其詩如見其人不啻寒得衣而飢得食有詠歌舞蹈於不自禁者斯文氣類之感固如是哉君爲人慷慨負高詣不爲世俗俯仰而學足以輔其才辭足以達其志身經離亂歷艱阻以其激昂不平之概發爲憂時感事之篇無待雕飾摹擬以爲工而亦非規規於一人一境者所能測其蘊蓄斯謙齋之詩所爲超然獨遠也廬陽據江淮形勝哲人代興

謙齋詩序

十二

咸同以來豪傑乘運而蔚起崇勳鴻烈銘勒旂常金石人才莫盛於此矣然獨至稽古績學之儒瑰異畸行之士以文章氣節自樹立者乃千百中未易一二覩焉僅存一奇特擅才望如謙齋者不謂舉俗猶詫爲狂怪而風漢日之也自古以怪狂稱者孰有如東方曼倩揚子雲其人哉落拓長安中當時貴人莫之與而讀其客難解嘲諸製千載下但想見其賢惡覩所謂狂怪也今長安貴人抑多矣令各晚節持清議者不敢預爲臧否而惟謙齋之豐於才阨於遇固可卽其詩論次其人雖未知於東方曼倩揚子雲有合與不要其文藻品誼固得江山之助而擅風雅之歸



者也彼詫而目之者奚爲哉昌翰雖艾老猶冀爲江淮之游倘得叩關而坐君遺園與之上下議論庶幾有以覘謙齋狂怪果何如抑藉慰三十年饑渴歟光緒乙酉嘉平月桐城方昌翰拜識

今天下有詩乎哉富貴利祿之人挾其聲病排比之術以于有司幸而得志卽又慮不足與通人鉅儒上下其名稱迺稍稍學爲詠歌而其所言則又大都嘲弄風月之詞與夫古之人通諷諭盡忠孝者無與也巖壑之間有少知讀書之士又往往高其術以驕貴人而所謂貴人者怒而詆之以爲是固不足與論天下事則不至盡滅天下大能讀

謙齋詩序

十三

書之士而毀棄賢聖之道不止嗟乎豈特吾道之患蓋亦天下之憂也世之古也瞽爲詩工誦箴諫庶人謗商旅於市百工獻藝今皆不能冠帶者旣相率爲委蛇之行獨此一二豪俊撫覽時事宛轉自鳴存天下之公孔子而生吾猶必其在弟子之列也而菅蒯棄乎哉韓宣子之聘於鄭也未嘗知有醜蔑在其國也以一言之善而遂使見重於其主所謂大臣之心也向使宣子漠然而聽之而無所動於心則亦尋常貴人而已蔑雖賢惡得與聞國政哉國家中興以來才峻滿天下而合肥王先生賢者也讀書負異論時事利害若觀火數發憤感涕尤善歌詩先後見知於



東阿新甯二公從兵間有勞當得大官益棄去放意山谷  
或聳之出曰以子材附風雲而驥公卿不足得也先生曰  
嗟乎吾窮分耳吾能蹶蹶從大夫後哉且吾見知諸公諸  
公死吾不失爲民坐覽時務作歌告哀冀無斃乎諸公之  
心所以報也昔者廉將軍旣下相如相如感激卒爲死交  
鄼侯薦曹參之材參奉曩規實成相業然必有金石之誓  
車馬章鞞之貴迺可無貳獨先生以詞章之微感激知已  
至欲以空文承在賢之心是愈可多也然則相如未足以  
爲重曹參未足以爲美與抑自審非富貴利祿之才又不  
屑高其術以驕貴人而迺以空文自表見與何其遠也詩

謙齋詩序

十四

集若十卷諸老先生方謀布之余因述詩教之不可以弗  
重而諸公之知先生爲難能與先生所以自處之當如此  
亦欲使天下心先生之心者皆知所以處其身也光緒壬  
辰冬月泰興門人朱銘盤頓首謹撰



跋

合肥王謙齋柱史秉軼俗之才負匡時之畧老而不遇抱  
膝孤吟深究四始六義之旨垂四十年既哀然成集矣嗟  
乎謙齋豈第以詩傳哉余昔棄觚從戎馳驅江淮間羣盜  
蜂起兵單餉乏謙齋以書生爲諸帥座上客掉三寸舌從  
容策畫動能扼賊之吭咸豐十一年苗饑方張壽圍益急  
廬與壽接壤城久陷賊肥西爭築寨自衛隱窺六霍爲營  
窟計若無人倡援壽之議恐亂又生矣謙齋出入刀劍之  
中南來約練由三角寺進援壽州會楚師東下捷音踵至  
江淮局勢爲之一變而淮軍繼起遂成中興之功粵捻蕩

謙齋詩序

平都人士文經武緯震耀一時謙齋潔身養親嘯歌自適  
時而恣山水之遊興盡則反不夷不惠亦莊亦諧其胸襟  
浩蕩豈尋常詩人所能測哉余承乏斯土十有餘年今奉  
簡命備兵臯蘭將去廬與謙齋話別索觀所著詩集巧方  
子箴山長選訂分俸助梓以公諸世夫徵文考獻守土者  
之責也余不敏愧無德澤及民獨拳拳於一老俾爲此邦  
矜式並綴數語竊附大雅之末幸矣光緒丙戌孟春清泉  
黃雲拜跋于樂園



評語

清詞月朗逸興雲飛七古七律尤多佳構平梁故多詩人得君足爲後勁從茲力求古人精處實處所造更未可量昔六祖於碓屋中其道已成猶必腰石三年卽此意也己酉孟冬桐城姚瑩識

讀大集天資英邁又能澤之以書卷知其沂沿於前人詩集者久矣第作詩大旨不外溫柔敦厚若鋒穎太露不失之易卽失之粗一蹈時人窠臼便去古日遠蓋非一字不苟則不知作詩之難有一字影響則不知詩律之細鍊而不滯豪而不滑思過半矣至製題之難更勝於詩巧則近於詞題拙必類於尺牘此中消息古人與稽也壬子仲春錢塘李本仁

謙齋詩評

清氣健筆倜儻不羣五律七絕諸佳什音韻悠揚令人尋味不盡蓋詩之境界不越華妙精深大作華妙處多精深處少宜更寢饋古大家於奧折道鍊之中用意便爲一代作者矣壬子秋柏硯山人梅曾亮識於冶城寄圃

余曩愛家元真漁歌予惜後來無能繼之者合肥王謙齋茂才小輞川權歌有元真之趣而幽秀過之善畫者不能得其似善歌者無以繼其聲快書數語以志嚮往浮槎秀色常繁余心目中矣珠海老漁張維屏



嘉慶初余一再權廬州都尉同官中左杏莊中丞方宰合肥周石苔大令權別駕黃小迂汪東庭楊挹峯皆司鐸孫淵如觀察適應張鞠園太守之聘修郡志因得時相唱酬每相與物色郡中詩人而始終竟未一遇使彼時得好學耽吟如我謙齋者把臂入林久矣謙齋富於春秋一心風雅他時一品集成必爲雞林爭購余老矣拭目俟之咸豐壬子中秋武進湯貽汾

謙齋詩俊邁天出余嘗比之劉公幹惜未適耳是册如贈臧君牧庵登射蛟臺人日題壁諸詩高文勝寄豈殊作者余與君居相邇今投老湖干日短衣窄袖從諸健兒追逐

謙齋詩評

二一

於平岡淺草中笑呼爲樂不復提掉毛錐矣偶校是册憮然喟然癸丑十三日同里徐子苓醉跋於拳石山房

金陵余舊遊處度是時腰金蟒玉者盡化爲飛燐凍雨何論燕燕鶯鶯輩耶此劫正未易了讀畫蘭行金陵雜憶諸作輒喚奈何也癸丑重九日子苓又跋

癸丑仲冬十二日廬城戒嚴余守西門越五日地雷發城崩余囊土先登見偉少年昂然直立女牆上指揮團丁大呼退者斬倉卒未暇通一言泱晨遇於中丞座上所陳兵事中機要始驚而識之及讀其詩率多孤憤語有心人也廬陽重地狂寇蝟集事方殷君竒才將大展其所藏於詩



可概見云楚南鄒漢勛

清氣一往爽爽有神於古人意境興象深造有得不獨章法格律中節協茲舉塵世一切庸滯齷齪之氣末由犯其筆端得天既優人力亦不淺可稱作者矣再能出之以艱難深之以奧折蓄之以沈厚則更當於古大家求之余別謙齋四年矣時事滄桑同遭大難人亡家破萍梗播遷無意中相值於懷遠出新詩二冊傳作甚多而廬陷以後詩乃更進余近作亦似稍優世亂未平吾輩徒以詩寄其憂憫不亦重可悲乎杜公曰安危大臣在何必淚交流則謙齋與余亦惟作草野秋蟲以待大難之夷而已咸豐乙卯

謙齋詩評

三

九月桐城戴鈞衡

詩以言志不必貌襲前賢自有我之真性情真面目在謙齋尙氣節好論當時事目空流輩客冬渡渦淮趨蒙亳倚劍揮杯潛弭兵禍昌黎之折庭奏扶風之策隗囂方之古人又何多讓途中所歷盡發之於詩謙齋不朽矣至其造詣之淺深格律之高下恒學質謏陋不敢妄讚一辭戊午仲春項城袁保恒謹跋於固始行營

合觀諸體清折是作者本色其感時憤事處悲壯淒涼直欲擊碎唾壺矣戊午春初嘯庵董澂鏡識

余居京師與同年生凌少南舍人善比之定遠舍人尙未



歸方漠然無所向既而識王子謙齋相得歡甚不數日而少南亦自京師歸少南古雅謙齋俊厲其詩皆如其人戎馬擾攘中得以相從談藝余之幸也謙齋詩甚富欲余論其可否此謙齋不自慨之盛意然其集中經徐毅甫戴存莊董嘯庵論定三子皆余友且深於詩謙齋自以意折衷之可矣無待於余言且詩之得失惟作者自知之而非他人所能參者至其偶有過於快易之病則澤古既久自能去之亦無待於余言也咸豐己未春瑞安孫衣言識  
當天寶流離之世爲拾遺徒步之悲慷慨激昂令人不忍卒讀己未仲春常熟翁同書跋於定遠行館

謙齋詩評

四

昔人有詩云我讓出頭非譚語世無敵手始竒才集中題詠如張南山湯雨生侯青甫梅伯言輩皆一時詩伯而雨生更許把臂入林是不僅讓出一頭地矣諸君子皆余故人憶當年追逐詞壇抵掌談讌恍如昨日今雨生已殉難青甫伯言並歸道山南山在粵雖高老年間其暮景流離亦復自傷潦倒不意別後廿餘年都成春夢因讀君詩感舊懷人爲悵惘者久之己未秋古蓼春綬王庭蘭拜識

寄興遒深鍊局雄放在杜蘇間絕句澹蕩夷猶不著一毫力量而神韻自得予老矣卽得不低頭下拜戊辰歲暮篆

卿老人蔡邦甸跋



謙齋與余皆酉年生余長二紀謙齋贈句有雞雖覓食未  
傷廉因鐫小印曰雞廉君家荆公誕於辛酉號白雞生君  
降於乙酉亦號木雞殆兼取紀渚木雞之義耳余謂詩有  
五音君命宮乙酉故君之詩近於宮亂後諸作時發變徵  
之音而商音獨多余舊著韻學一書推論子母相生法一  
歸於自然之元音先師包慎伯周保緒二公閱之嘆爲人  
不能到人亦不肯學近代諸家知審音者罕矣安得起包  
周二公而請益之己巳秋月壽春周元輔志

昔讀謙齋詩如入五都之市百貨具陳珠貝珊瑚龍宮璨  
爛播於世者久矣今觀此卷則又變化從心寓清新於警

謙齋詩評

鍊含蒼勁於婀娜繪影有聲詠事入古凡口有不能言者  
皆發於毫端千載而後不可作信史觀耶吾黨少時以斯  
文相砥礪而情又最密者如蓉洲斗垣命之諸輩皆歸地  
下所可見者惟謙齋一人尙得從事於斯且可長相把晤  
非幸事歟然亦孤矣因不禁感而書之同治辛未二月桐  
城待園弟江有蘭拜識

謙齋詩豪宕有奇氣根乎性情緯以時事殆深有得於詩  
之旨者前集有固始王春綬師評語長白西林宮保攜去  
全豹未窺老懷殊悵悵耳辛未七月旣望道州何紹基識  
於揚州題襟館



大箸雄深雅健變化神奇上者摩浣花之壘次亦具體劍南惟走筆酬應之作宜刪汰耳癸酉閏月江夏鄭襄前編竒宕幽秀出入昌黎昌谷之間此編却與蘇陸爲近古近異製筆亦因之極詩家之能事矣武進管樂拜識格調高渾寄託遙深直追少陵一派非文房以下諸子所能望其肩背深服吾謙齋之詩與年俱進惜西隄山人不作未得共覩爲快耳同治癸酉閏月遼陽裕庚

大箸才氣噴溢自是本色較之辛酉以前雖漸造平浚而賈其餘勇尙足凌厲諸子七律轉折渾成意象深遠尤爲近時所罕見敬書數語以奉瓣香鳳臺晚學方士貞跋

謙齋詩評

六

昔人論詩才學識三者不可缺一謙齋之學富故才豪才豪故識高統觀諸作筆鋒俊邁思意沈鬱信乎直入唐宋之室而得其髓者矣蓋謙齋遭遇時艱悲歌當哭亦若得助於名山大川其詩乃能特立不羣天殆借此亂運以成謙齋之才耶謙齋其幸耶其不幸耶全椒薛時雨拜識

癸丑以後各詩直逼杜陵聲調悲涼風格道上身所歷目所接胸中憤懣不平悉寓於章句中空同于鱗無病呻吟那復有斯沈痛捧誦數過佩服無地非詩能窮人窮者自工古人閱歷之言允堪移贈庚辰正月方濬師拜跋

大作出入唐宋不各一體壬戌以前以推麗勝癸酉以後



以平澹勝爲境屢變而亦各有所失最感者其癸亥至壬申之間乎舊編爲琴西魯川毅甫三先生點定去取精當後爲果敏公攜去往在西疆猶及見之茲復編錄將付手民適孟自京師歸出以相質因讀竟三日夜之力擇別頗慎而不能無疑惜琴老遠隔四明不能起馮徐九原而共証之也噫癸未八月晚學方希孟謹識

大作天才宏放生氣遠出而能緯以學問養以性情故感激豪宕而不失之囂張華妙生動而非專事刻畫壬戌以後之作則寄託高遠簡淨精微如各花古鏡閑雲太空有攬挹不盡之趣天機旣合妙不自覺也道咸以來作者寥

寥訖雅揚風當爲先生位置一席藝林品藻自有公論非輕一人私言敢以持贈用當息壤任邱卓存邊保極識光緒戊子正月至二月敬讀一過集端有吾祖題記想見當日題襟館唱和之盛至先生之詩籠罩萬有非虛薄所能妄評惟有斂手拜倒而已道州世姪何維樸謹跋

仗氣愛竒動多振絕真骨凌霜高風邁俗此謙齋昔日之作也今以七年之別重聚揚州讀別後詩典裁俊拔與古爲新性情所至風格立焉歎作者能得古人之深也雨雪遄歸恩遽遂別書在簡端以識遊好已丑冬聖秋徐衡

大集由漢魏以逮金元皆有出入以明人例之其青邱乎



廬江舊能詩孔雀東南飛在樂府中獨爲古豔嗣唐兀狐  
鳴於元季定山嶮進於國初軍興以來此事幾於廣陵  
散矣先生負竒兀岸生值亂離舉一切可驚可喜迂怪愁  
苦之事盡發之於詩至其字法樸老句法蒼勁章法渾成  
連篇累牘却有首尾銜接之妙轉捩突起更有超忽不羈  
之狀所謂老去漸於詩律細匪惟接風詩之傳抑亦爲風  
會之幸與桐城後學楊洛鑑拜識

筆兼三唐人備四氣語語從性情中流出所以高挹羣言  
不落他人谿徑後之讀五峯詩者如與促膝一室也新城  
黃長森襄男拜跋

謙齋詩評

合肥王謙齋詩集屬余審定訖謙齋早飲香名淮南文學  
有志節之士也與徐子苓毅甫齊各家世儒術銳意爲世  
用兵間與父育泉徵君號召鄉兵扶義禦寇廬州陷時尙  
從江忠烈助干楨之役也已而游諸帥戎幕勝保侍郎統  
師日遣說苗練降勝去復畔廬州豪傑突起兜鍪貂蟬百  
十而羸謙齋以儒冠老故跌宕竒氣一寓於詩五十而後  
脫畧公卿自附於曼倩之流知者猶以爲魯連先生也詩  
與毅甫皆學杜徐詩驚悍不參異已謙齋則王孟蘇陸時  
掇其勝近歲且慕高澹漸近自然毅甫沒無抗顏行者矣  
詩數千首落其實可誦者尙千餘篇仁和譚廷獻記



余家自黃州公以來代有專集暨余已八葉矣束髮趨庭  
卽嗜吟詠壯而獲交海內賢士夫少解作詩之旨然深惡  
夫脩詞不誠借此爲梯徑者於是偃蹇抑塞以迄於今日  
睹鄉邦之治亂世運之消長人事之盛衰倚伏旁及一名  
一物偶有所觸無不寓之於詩而髭莖撚斷心益耗殘學  
殖就荒疑義誰晰舊時儔侶或長歸地下或遠在天涯獨  
立蒼茫仰承墜緒其亦可慨也夫爰就友朋所選編爲三  
集聊當年譜後之覽者足以覘其生平已光緒甲午十一  
月望遺園老人王尙辰自敘

謙齋詩序



謙齋初集

逍遙夢影錄自壬寅  
癸丑

合肥王尚辰伯垣

詠葵

秋風從西來百卉少顏色灼灼園中葵孤根勁且特氣色  
配中央大雅去雕飾鑒茲傾日心不減古忠直

題周保緒

濟

文逍遙津聯句卷後

春水園荒蝶夢孤記從嵇阮醉黃壚平生喜見竒男子入  
世羞稱賤丈夫不分冷官拋苜蓿那堪清影落江湖消殘  
泥雪空留跡腸斷當年王客圖

鍾離道中

謙齋初集

迢迢大道暗黃塵匹馬衝風曉問津客裏渾忘寒食節山  
城如夢不知春

臨淮早發

臨濠山色盡一棹向天涯毳服當關吏蘆簾市餅家雨村  
低近水風樹遠含沙已過春分日長隄未見花

遊夢緣庵

廟峙白雲邊霞樓嶺外天老松盤石磴清磬落風泉客借  
安禪榻僧耕供佛田軟塵何處入明月下蒼烟

雨飲騫山草堂

農忙正旁午不欲惱田家展席溪雲起穿林酒旆斜春愁



連暮雨孤客伴殘花富貴浮漚耳閉居亦種瓜

謂周制軍敬脩卜居

下山

送周星垣丈

光斗

回東阿

送君天際去雲樹隔烟巒南望平湖水東風三月寒柳棉  
飛野店花雨撲征鞍且盡尊前樂清歌到夜闌

催租行

眼前麥熟休浪喜腰鎌纔釋催科起晨負麥去夕負還家  
家不乏誰下錢欲乞稍寬須速備一雞半豚先媚吏行當  
鬻婦頭上簪累公受杖心自慚三日爲期公莫恚若免鞭  
笞卽公賜答言官亦慕陽城今日安能行古治送吏出門

謙齋初集

二

興歎嗟悔不當年求捕蛇

旺莊遣興

在閔子集西爲前明武氏故宅

趁墟爭負戴市小壓頽牆飲馬方塘濁炊烟野竈香昔賢  
餘舊壠故邸盡荒莊誰向騫山側青松護草堂

村行經閱賢祠

黃牛慣倒騎遠近隨牛步後嶺作前山前林成後樹越溝  
偶一騰嚼草時小任倦枕牛背眠塊然忘朝暮不知去幾  
里歷歷過村聚青峯何冥冥中有孝友墓欲尋舊茆茨蓬  
蒿莽無數丁甯老叢鯁坦險慎行路

旺莊晚眺



暮景動寒意登高趁晚間  
浚烟明遠浦斜日下空山  
岸火歸鴻避林沙獵騎還  
西鄰新釀熟帶月叩柴關

游武氏西園

草長行踪少尋秋獨自來  
煮茶收落葉晒藥掃莓苔  
果熟猿爭獻雲歸鶴未回  
山居多樂事欲去漫徘徊

周敬脩天爵制軍座中呈益陽湯海秋鵬先生

年少粗能記典墳敢誇艇  
鼠嶺終軍湘江浪濶澄  
孤月秦岱峯高仰片雲吏  
治漢廷尊汲黯文章唐室  
重劉蕡東山久繫蒼生望  
雷雨經綸共策勳

潘少白謬先生贈武林董文恭相國畫

謙齋初集

三

玉堂揮翰寫霜翎遠寄江  
南老客星恠底巾箱勤  
護惜山陽怨笛不堪聽

黃扉使相間情在席帽  
山人逸品高一代文章  
鸚鵡賦可應分得鳳凰毛

月夜聽蔡山人環乙鼓琴

三尺綠綺葉護之紫錦  
囊偶然一撫弄秋聲流  
清商一絃一寸心絃短  
心何長寒泉繞左右獨  
鶴自飛翔收葉不復彈  
恐爲知音傷

聞哭

清夜哭清夜何人哭哭聲  
淒切繞簷竹月轉廊迴  
聽不真



慙知鄰婢遭鞭撲朝朝暮暮供驅使底事主人猶不喜父  
兮母兮痛何知悔不生時卽投水主人亦自愛嬌兒終日  
香閨學畫眉不怨主人仍怨己怨己貧賤命如此

禱雨歌爲沈和齋

祥煦

大令作

雌風愾溷日號怒樹梢搶地飛塵埃四月暄熱過五月紅  
輪當午爭燔煨昨朝有鬼持扇去獨禁大暑徒噫歎數舉  
故事禁屠宰禱者結悞人方哈城隍廟中搥大鼓羽士誦  
經巫起舞巫傳神語官應知神所欲行官莫違名垂循吏  
亦人耳誰言古治今難爲愁看早魃虐如此甘霖隨  
至矣盡爲蒼生洗鬱冤桑田稅駕謹聲起

謙齋初集

四

浮槎山道林寺題壁

我輩多塵累愛山難住山安能千日醉不共片雲還

晚過趣園懷蔡丈靜遠

邦宜

徵君

林荒鳥語寂石繡土花綠誰識古城均尚有幽人屋

秋熱

白藏節已半赤曦宛三庚秋暄補夏暑酷吏尤縱橫癡蠅  
逐鼻擾饑蚊繞榻鳴浴罷汗沾背露袒心稍清蓐收方用  
事祝融乃力爭神猶戀權勢人何足譏評炎涼變須臾颯  
颯盲颯生朝來越葛重晚來吳棉輕萬動慘不驕霜威凜  
崢嶸誰知舉體熱是夢今始醒



雨望

龜紋辛苦把鉏犁一雨欣看豆葉齊人著綠蓑綠徑去馬  
銜青草過林嘶秋將賽社憐歸燕陰不知時信午雞已卜  
瀟瀟擁衾聽濕雲如絮羃山低

壽春道中

野水香殘荷榆柳映蓬戶舍鞭倚轆轤樹下面場圃禾黍  
已西成蕎麥初覆土暗蟲時有聲敗葉堆環堵田公望烟  
歸披襟憇亭午緬懷沮溺徒耦耕風味古

雪霽楊將軍廟晚眺歸過趙氏怡園

跋驢狹路叩西關萬瓦鱗鱗繞市闐凍雪壓城封樹頂怒

謙齋初集

五

髯如戟豔神顏一行野鷺閒隨艇數點征鴻遠過山日暮  
鍾聲催客起名園醉折早梅還

除夕留當塗謝小筠

寶樹

茂才守歲

雨雪連旬歲已闌圖成九九記消寒園官爭報唐花放客  
子空憐馮鈇彈字剪宜春新送喜書臨乞米久知難一聲  
爆竹林鴉起滿飲屠蘇且盡歡

丙午春日東郊觀稼

春風動原野草木皆自私嘉種生平疇雨露愛及時后稷  
沒已久農人何孜孜拮据供賦稅樂歲終在茲寄語潛脩  
子樹德其務滋



寄周遠齋元輔茂才兼索小輞川圖

落絮飛花撲綺檐相思春暮別愁添學仙可許求黃獨謝  
客無如枕黑甜蟬解嘶風甘守潔雞雖覓食未傷廉輞川  
烟水難摹畫何日重遊拂素練

白繡毬詞

楊花飛雪落枝頭繡出東風一段愁錦帳流蘇香霧濕月  
明如水夢揚州

大風

狂飈怒號天地動星河破碎鬼神闕大聲遠呼將倒山盛  
氣猛舒如出壘千里訇哮拔樹輕一陣橫斜撲簾重荒祠  
牆畔瓦鴛飛貧家屋上茅龍控老農無言扶杖立呼兒索  
絢忙繕葺噫吁嘻傷屋尙可勿傷麥租稅今年催更迫

呈方丈蓮舫士淦太守

冶水雲霞報早春淮山猿鶴結幽鄰平生高義傾三黨父  
執深交有幾人話到宦情消杜牧公曾守湖州傳來尺牘重陳  
遵感懷漫記冰山事觴詠天留自在身

爲內子題扇上芭蕉

年來種紙向疎櫺深院芭蕉帶雨聽十幅烏闌詩百絕珍  
珠小字寫黃庭

夜坐遲孫少臣瀚茂才不至



雨後晚涼歸期君未掩扉花明知月上樹暗漏星稀鷺鳥  
棲巢定流螢隔院飛料應難觸熱腹捧瓠壺肥

郊外

林外沙頭落日餘綠烟紅雨暗村墟  
恩恩上塚人歸晚野水齊腰漫渡驢

幾別何地山

廷謙

太史之皖江

草色鋪茵花滿城逍遙津上送君行  
醉殘紅燭猶今夕數到青山第幾程  
爪迹偶留廬子國鞭絲遙指皖公城  
兩家文字兼交誼別後應思太瘦生

題趙丈響泉

席珍

廣文春江夢影錄後

謙齋初集

七

醉倒梨花酒一罌春江夢影記分明  
樓臺烟雨都陳迹曠達猶留身後名

送程鶴衫

紹裘

之龍舒

風曳亂花飛芳郊賸落暉送君今日去  
來歲共春歸

夏日途中

風曳蟬聲噪晚烟停車緩步小橋邊  
斜陽紅暈波心水遠岫青浮雨脚天  
鄰婦叩門驚犬吠牧兒常道枕牛眠  
勞客路頻來往好借槐陰暫息肩

觀涪翁墨跡

洗眼放觀山谷跡一時竒癢快搔爬  
筆乃骨堅肥亦瘦字



如拳大整還斜臨池波磔兼三折落紙烟雲自一家畫舫  
中宵騰寶氣防他神物暗摧拏

丁未春日懷人

懷甯方小東湖茂才

黃沙撲面凍雲乾匹馬蕭蕭易水寒遙憶故人風雪裏鸛  
裘換酒醉邯鄲小東

甘泉李少白文鐸少尉

廿四橋邊醉管絃多情參得美人禪書眉聲裏花如雨浚  
染春山一抹烟少白室人

同里趙文野航對徵學博

謙齋初集

八

冀北春歸沙似雪江南夢醒草如烟平生祇有襄陽癖未  
了人間翰墨緣

同里吳引之獻山人

誰識平梁老畫師半生潦倒髻成絲思君家在巢湖側流  
水桃花下網時

病起

鑪香茗椀跡全非病起情懷與俗違塵鏡乍開驚我瘦瓦  
甌斜插喜花肥魚知春意跳波上鳥弄晴聲繞樹飛相約  
故人今日至呼僮掃徑啟柴扉

歎蝗



聞道淮西旱飛蝗更蔽天微蟲今憤憤不識魯公賢

秋日訪彭大伯韞

椿蒸

我懷彭處士秋晚出西城野鷺冲烟起疲驢冒暑行水香  
知稻熟樹老抱蟬鳴村際夕陽下柴門望處明

晨過孕石屋伯韞留食新糜

破曉重來訪秋曦未下牆蝸涎粘畫壁蝠糞散書牀瘦竹  
滴清露疏花孕冷香昨宵春白粲鹽鼓快新嘗

宿山家

修竹影蒼蒼泉聲石罅藏林深飛鳥倦山靜吐雲忙茆舍  
泥爲榻居人芋作糧村醪留客醉下馬解輕裝

謙齋初集

九

戊申春日遊逍遙津

芳草滿汀洲繁花散遠疇野橋支曲徑急雨亂春流樹暗  
聞啼鳥波平看浴鷗柴門臨水近罷釣繫漁舟

舅氏李拙齋

芝生

先生將赴皖小飲花下

檢點珊瑚舊筆牀春風一騎促行裝璞藏未易千人識  
磨翻憐鎖日忙世味酸辛嘗不盡兒時情景話彌長碧桃  
庭畔開將落笑倚欄干快舉觴

舅氏工書宗  
梁聞山大合

送宋雲屏

錦

之江甯

春程最有情草靚馬蹏輕綠樹雲亭驛青山浦子城解鞍

江月上吹笛海潮生隔岸傷心處君應畫不成

雲屏  
工畫



遊沁芳園呈戴疊峰鴻恩先生

浮沈宦海髻毛班小構園林且達觀移竹月來分綠淺種  
花春老惜紅殘事皆適意千旬少文欲垂名一字難世路  
崎嶇何足問匡牀夢穩酒腸寬

感懷表兄張瑤初爾琪大令

一夢西湖便不醒落花濺淚語流鶯瀧岡寄恨埋阡表宦  
海無人記姓名老屋數椽愁易主遺孤千里滯行程年年  
江上秋風起猶說思歸張步兵

壽春旅次感懷表兄孫沛農家澤祠部

曉鶯聲裏雨濛濛淮水無情又向東遠客愁逢寒食節春

謙齋初集

十

風魂斷杏花中何堪日下聞歸櫂曾共湖邊把釣筒淩墨  
遺書猶挂壁近來兄事少興公

秋日遊蜀山

巖風吹送午鐘聲杳杳松陰夾道行亂石嵯峨偏礙路野  
花開落不知名山空草長龍湫洞寺破雲荒佛面生老衲  
煮泉閒話久一鞭歸趁夕陽明

重九柬吳丈菊坡克俊索畫

病起神猶健顏衰髮更新殘年花作伴老屋佛爲鄰耳塞  
呼聲叟頭銜署酒民興酣閒潑墨妙筆任天真

晚秋過環翠墩元葛景先徵君故居



秋深湖汊淺馬渡碧流中小市魚蝦聚貧家樹木叢人閒  
編虎落霜降祝牛宮環翠墩邊過猶存古處風

送裘小華

德俊

選貢返河間

迢迢征路遠瘦馬別荒城落盡淮西葉長爲冀北行河聲  
流客恨山色送君情隴上梅花發歸途計幾程

送表兄孫引恬

家秦

比部北上

一夜朔風寒千林木葉乾送君今日去小住片時難此別  
何年晤相思各淚彈南來逢驛使爲我報平安  
昔我到淮城逢君又遠征幾年疏問訊一夕話離情堂構  
仔肩重親朋感慨生此行須努力慎勿負清平

謙齋初集

十一

北莊卽事柬伯韞索觀文待詔山水

已過重陽節催租又下鄉三家臨水店獨木架魚梁破帽  
遮秋日疲驢犯早霜洗杯頻讀畫先到故人莊

瓦埠晚渡

水氣浴斜曛榜人喚渡殷鴉聲喧落葉雁陣亂寒雲市遠  
炊烟出林深暮色分晚過君子里斷碣訪遺墳

必子墓

除夕接趙雲持

彥倫

書代柬

殘雪平堦積孤樽餞歲歸舊家門巷冷急難友朋稀古鉢  
燒松響寒燈放燄微平津當晚遇轉嘆少年非

已酉花朝口占



記得尋芳二月時，辛夷開盡柳垂絲。而今事事居人後，花  
木逢春也覺遲。

懷江丈龍門開大

一官落魄寄三秦，渭上風塵老此身。盼斷青青新柳色，天  
涯猶有宦遊人。

遊香花墩

閒沽白墮買山肴，來訪祠堂近水坳。一角遠峯遮落日，數  
椽老屋傍荒郊。飛花零碎初辭樹，歸鳥參差各認巢。爲愛  
沿堤新柳色，春光如許未能拋。

喜周遠齋來自六安，招吳鞠坡、文趙雲持謝小筠李。

謙齋初集

十一

少白夜飲席閒索題青溪話舊圖，卽送歸壽州並

懷表叔孫小雲

長和

廣文虞臣

禮元

茂才表兄稼

生家穀選貢

人生能得一知己，側身天地無憾矣。與君長嘯東城頭，三  
載相思從此始。下無鯉魚上無鴻，浮槎道上乏詩筒。措大  
失策家屢空，飽食常愧多牛翁。匝地雪花大如手，忽見貧  
交開笑口。燒殘銀燭夜光寒，斗室圍爐聯素友。酒懷正渴  
雞聲起明朝，又復各分徙筵前。顧曲數周郎，夢墮青溪烟  
水裏。青溪小閣西風涼，囊琴匣劍增游裝。槐花忙踏長干  
里，白眼看人號酒狂。浮名枉被青袍誤，幡然跨鶴揚州去。



平山堂下幾清明斜日牛帆飛柳絮歸來逸興寄鷗鳧月  
落雲停意境孤秋窗擁被憑誰話韻事須添感舊圖經營  
慘澹愁先注江上青山尙如故春水園荒宿草深一杯黃

土才人墓

周保緒丈

安吳筆勢追中峯

包慎伯丈

將軍畫法兼南宗

湯雨生丈

馮唐論將今已老

馮晉魚丈

汪倫送客情何窮

汪筠之丈

過江

名士多憔悴繞樹烏啼愁不寐隻身跳走古臯城猖狂灑  
盡窮途淚雪泥到處留鴻爪張觸前遊成畫稿半生潦倒  
困風塵彈指光陰驚草草名山回首夢魂飛結客江湖往  
事非只有青溪無恙水年年花落送人歸我亦誅茆箏笛  
浦蒹葭瑟瑟鳴柔艣擬作朝川別墅圖尺幅烟嵐倩君補

謙齋初集

十三

送君歸去白雲中歌傳招隱山崑龍淮南賓客皆仙侶漫  
話青溪舊日蹤

病中獨坐

下簾耽獨坐息慮萬緣空秋草餘寒翠疎花墜冷紅心閒  
書有益病久藥無功涼意誰參得披襟怯晚風

訪伯韞不值晚宿田家

幽人不我見悵悵至田家埜步隨歸犢穿林數暮鴉日華  
消柳色霜信到葵花把盞邀鄰叟新糜量更加

夜發全椒

夜發滁河口輕舸挂短篷亂山荒吐月禿柳怒呼風水響



鷺眠鳥鑑昏聽過鴻明朝沽美酒飛渡大江東

聞錢東平

江布衣談林少穆宮保舊事

憤來倚劍唱烏烏伏櫪誰憐壯志孤  
兩戒河山歸指掌一民心事負頭顱  
君自伊犁回號放歸一民盈庭自把長城壞失著全教  
此局輸舊是衛公老賓客酒酣談往獨嘻吁

臺城懷古

鐵騎橫江一葦過門開朱雀戰塵多  
君王醉倚沈香閣土女魂銷皂莢歌  
草長高臺灰畫字烟沈辱井水無波  
東南王氣連朝盡妖鳥聲聲喚奈何

登雨花岡謁方正學祠晚憇高座寺

謙齋初集

十四

一角危亭聳翠巒鱗鱗萬瓦接長干  
幾經劫火空花雨終古寒光湧雪湍  
瓜蔓恨埋秋草綠楓林冷愛夕陽丹  
鍾魚粥鼓維摩室來訪支公聽止觀

遊博山四松庵

虎踞雄關拱翠巖屈盤磴道石巉巖  
城頭樹色藏孤塔江面波光點亂帆  
風捲松濤疎雨過日移幢影片雲銜  
當年辟暑徵遺事小憩緡經脫布衫  
南唐暑風亭遺址

湯雨生

貼汾

都督出示太夫人斷釵吟屬題

散盡黃金兩鬢皤  
臯魚血淚老還多  
羣欣家誥標彤管  
應使門人廢蓼莪  
列鼎枉教悲仲路  
據鞍誰復惜廉頗  
何須



更說封侯骨畫筆詩名總不磨

舟行雜詠

白下看山興未闌蘆花如雪泊前灘舟人夜語驚殘夢萬  
派江聲到枕寒

龍江待風

纔別青谿第一程扁舟泊處晚潮生烏啼老木霜無跡雁  
渡寒江月有聲長觸鄉愁傾薄酒商量畫稿剪孤檠朝來  
順水揚舲去兩岸青山遞送迎

晚泊三山

江村傍晚繫孤舫旅興蕭然散遠汀出水一鉤新月白斜

謙齋初集

十五

陽萬疊暮山青年荒結網漁爭利廟破無僧佛不靈醉起  
倚篷回首望蒼茫烟樹翠微亭

晚過巢湖

放棹中流興更狂孤帆隱隱淨湖光粘天遠樹沈殘霞近  
水寒山淩夕陽大地人民歸浩劫頻年湖溢居民多被水患當年城郭  
總荒唐烟波萬頃投何處且逐鍾聲到上方

湖干阻雨

扁舟一葉泊湖干擁被殘宵夢未安雪壓蘆花驚雁起風  
掀浪雨打篷寒家園已近歸心急客况頻嗟行路難明日  
好同春信至終日洗杯定許話團圓



歸舟遣興

夢墮菰蒲埜水邊殘宵雙槩撥寒烟幾回狂笑呼明月我  
與梅花共一船

晚行

寒鴉聚處幾家存老屋蕭條有漏痕風散炊烟溪尾出林  
銜落日渡頭昏囊空路遠愁行客歲暮村稀早閉門埜色  
蒼茫聞犬吠短衣匹馬過荒原

悲饑年

窮居逢儉歲衣食知艱辛開門見流冗千口紛成羣縱使  
粟如土立盡太倉陳一朝大雪降道路愁行人嗷嗷思待

謙齋初集

十六

哺誰憐餓殍身老叟前致詞欲哭已聲吞馬齒七十年未  
有如今貧持女易百錢敢望君子仁爲婢真大幸免充雞  
與豚我聞益惆悵俯首淚沾巾麥熟亦易待努力掘草根  
上有堯舜君下有稷契臣

庚戌上巳日偕六弟桂山七弟翰臣遊逍遙津

柳色搖空水漫灘臨流小憩憊憑欄孤村傍晚雲陰合久  
雨將晴花氣寒野酌漁樵爭泥飲閒營邱壑勝求官況逢  
勝日重脩襍戴月歸來興未闌

小輞川題壁

竹籬茅舍傍城居一水迴環處士廬好友愛蓬蕭散客行



文懶作應酬書蘆碕拍浪驚眠鴨柳岸移陰看釣魚鄰叟  
閒來談往事醉傾濁酒剪春蔬

相思曲 謂鴉片也

炎荒瘴毒金蠶蠱皂鴉噉人肌骨腐磨脂滴血搗春花搏  
就相思一塊土相思土碎飛青烟拚教內地輸金錢閭閻  
元氣日澆薄網緼化作相思天相思兮相思相思朝暮無  
已時但願不識相思味待到相思悔已遲吁嗟乎世間多  
少奇男子一生甘爲相思死

春日奉懷

畫篋書筌共討論銀絲小篆紀新恩  
九重傳語褒忠

謙齋初集

十七

孝 李石梧制軍入覲天子知臣寄白門 湯雨生先生

包老工書通古法筆埋成塚墨成池紛紛俗學多虛造耳

食空談北魏碑 包慎伯先生

墨痕重認餘霞閣 借抱 康衛歸來雪滿簪 客秋先生避水

齋梅丈伯言潘丈少白不期而遇辰偕戴存莊侍側 赤手難償飢渴願憂時諸老伴

清談 姚石甫先生

翦張酒趙快誅鉏吉網羅鉗漫詆誣南望桂林烽火急白

頭擐甲痛慈烏 東阿周公

三月望日招方子箴 清願 太史唐星齋 增炳 明經吳

丈蔗翁趙雲持泛月迢迢津聯句



勝地良辰會佳客辰賓王陶然忘形迹祕事纔過三月三

俊朋簪小聚羅含宅雉堞東偏鬪臯池柳陰踈地綠絲

絲新蒲出水蘆芽短頤細麥飛花筍籜遲濠流屈曲環如

帶辰茆屋清幽隔埃壘濕雲低曳鳳樓邊頤暝烟遠抱漁

莊外繞籬莖菜蝶來稀俊去年燕子今年歸香生紅豆詞

人夢炳酒漬金庭逸客衣風流曠代追羲獻頤玉堂彩筆

凌雲健夜闌剪燭競飛觴辰相思他日詩留券當筵列坐

多古懷俊招得狂吟范陸儕翰墨因緣邀月證頤英雄事

業半塵埋危橋咫尺傳飛騎倫將臺久改招提寺一杵鐘

聲警睡魔辰千秋粉怨沈香甃已覺尊前感慨多俊那堪

謙齋初集

十八

萍梗逐風波偶臨香水尋鷗鷺倫還擬秋衣製菱荷唐衢

逃酒颺然去頤又索倚樓補題句霧散平蕪不辨青辰月

明大地都流素漸聞雜唱起前村俊埜景蒼茫夜色昏橘

釀瓶中傾賸滴倫鴻泥壁上認新痕天教占畫清閒福頤

山水怡情勝絲竹爲語今宵共醉人如此佳遊須再續辰

次日子箴復成二律屬和

春漲平谿晚波光漾渺冥鷗閒眠野水魚戲亂疎星戰壘

銷無跡香魂喚不醒惟餘舊時月伴我宿茆亭

笛聲留客住載酒更超然樹暗烟村合天空水鏡圓放船

疎柳外小語淺蘆邊共道今宵樂清遊未肯眠



晚晴在田家

晚晴出部駕輕車野蔓荒榛繞徑斜風掣亂雲堆作嶂雨  
燒殘日釀成霞秋原放犢閒吹笛斷港觀魚響落又早稻  
登場農事急相邀野老醉田家

荜眺

傍晚雞聲屋角啼尋秋信步過前溪棠梨結實連枝綴香  
稻颺花出穗齊一鷺拖煙穿樹去羣鴉背日障天低欲行  
且止心無定遠望山莊隔水西

苦雨

門設常關跡已陳空墜幾點綠苔新事無適意閒耽睡客

謙齋初集

一九

少知心懶詰人苦雨乍晴偷放日感秋易病勝傷春逍遙  
津畔波痕長自理琴絲結釣綸

中秋夜晴獨酌憶崑山徐竹香鳳岡茂才

不遣中秋去清輝放夜分浚烟能養月疏雨欲留雲夢覺  
香無隱涼生酒易醺君家富文藻閨閣亦清芬

白海棠和內子韻

更覺秋光冷花時蝶過稀柔情扶月起寒夢化煙飛竟體  
清無影微香沒襲衣與卿同寂寞相對也依依

靜極

靜極機緣息身閒歲月賒片雲陰庇樹小雨力催花砌濕



忙遷蟻墻低細篆蝸草堂人不到終日絕喧譁

蛩聲

微蟲不解事秋至動情懷使我心如訴閉吟月到階宵深  
啼露冷花落怨香埋遙憶清閨裏挑燈墜玉釵

秋夜憶伯韞用工部韻

別久翻無夢醒時獨汝思一從春水約三復谷風詩村遠  
秋歸早天寒雁到遲重陽知漸近莫負菊花期

題裘小華郎中海天長嘯圖

黑風怒驅海雲走祖龍鞭石老蛟吼仙人扶杖三山來手  
摘酒星大如斗排雲忽見金銀臺洞天窈窕開蓬萊俯視

謙齋初集

二十一

齊州烟九點笑指東溟水一杯蒼茫獨立發長嘯引入天  
風鳴萬竅千載桐江待拂衣一竿滄海堪垂釣河間公子  
人中豪筆端迅捷翻秋濤胸中阮籍餘塊壘眼前李白猶  
蓬蒿飄然逸興凌雲起乾坤何處稱觀止積氣全浮貝島  
高洪波倒立麟洲峙百川會合爭朝宗才人到此開心胸  
石鯨夜飛沃焦暗陽鳥下浴扶桑紅蘇門嘯肯流傳少難  
得竒情出塵表響落寥空白浪飛興酣滄海青天老若身  
仙骨君自知逼人富貴將何辭準擬前程青瑣闥漫言舊  
夢白雲司披圖一見渾如故瀟灑風前臨玉樹野鶴蕭然  
寄性情祥麟本自饒丰度海內經師老鄭元化南屢求琪



樹試丹淵但看入網庸非寶畧解吹簫未是僊眉山門下  
李方叔夙仰斜川才百斛十年蠡測定何知飲海從今期  
滿腹

過龔芝麓尙書故第

巷口荒祠落照明定山堂下少人行芳池久洞蛙爭鬧枯  
樹無靈草寄生一代詞章追孝穆千秋出處擬元成風流  
不愧騷壇長江左於今尙有名

過李文定相國故址

聖祖龍飛三十載貞松寵賚相公家偃兵四海欣無事守  
法羣工慎不譁孝行格天消旱魃文章繼志擅春華

丹壑  
太史

謙齋初集

一一一

百年喬木凋零盡惆悵荒園落楸花

冬夜同人集小輞川卽餞戴蓉洲

鈞衡

孝廉歸柯城

朔風捲地烏夜號同雲四散霜天高怪樹攫人鬼猙立蒼  
茫凍月寒生毛蝸廬斗大儘容膝詩兵酒將招吾曹剡溪  
小戴萬人敵英姿颯爽尤雄豪興酣離席蹶然起日如岩  
電光騰霄一聲長嘯迸金石滿空風雨何蕭騷揮戈挽住  
魯陽日控弦射走錢江濤將才徐庶

毅甫

輒避舍老謀趙

括

雲持

先奔逃我逞偏師數挑戰詞壇小隊精兵鏖一擊

不中銳氣沮旗靡輒亂塵氛翬寶主雜沓各閔笑擅燼洗  
盜傾葡萄累舉十觴亦不醉屠門大嚼噉老饕感君俠骨



自千古當筵解贈王郎刀書生上馬快殺賊燕然勒石銘  
勲勞著書閉門等閑事莫教賫志埋蓬蒿不然南山射猛  
虎抑或滄海求靈鰲高談雄辨猶未已杯盤狼藉聲喧嘈  
寒雞亂叫燭光短送君此去心忉忉林荒月黑絕人跡嚴  
城古剎撞蒲牢

辛亥四日徐毅甫

子陵

孝廉過墨春軒索蘭花隔日

酬以詩又乞盆梅却答兼招飲

蘭以此君子相交臭味親名園添石友余意結梅隣野趣  
能醫俗孤芳自賞春恰逢人日至好作咏花人

晚遂草堂移石感懷蔗翁

謙齋初集

一一一

故人今化去三徑亦全荒遺贈仇池石長辭晚遂堂園花  
愁易主畫筆禿盈囊廡下頽淒絕誰憐老孟光

施小癡

森柏

過訪感懷尊甫墨癡

庭桂

世丈

一別又三載孤蹤不可尋藝猶工畫象身是倦飛禽鄭車  
鳴陰感艱難負米心輞川重過訪話舊淚沾襟

月夜懷裘小華京師

明月不常得清光飛上天與君千里共遲我一宵眠顧影  
憐知已揮杯醉隔年人生有聚散莫怨別時圓

雨後遊逍遙津

入夏三宵雨池痕隱釣床白鷗隨鷺浴青草絆人長水氣



明虛幌山光逗女墻漁哥驚午夢相與味滄浪

夜過蜀山

疎雨前山過山行始覺秋松梢下涼月竹徑響清流眾籟曠然寂空青遠若浮埜香何處是早稻穗初抽

舍山南郊拜曾祖墓

在花山上

邱壠今無恙松楸護墓門泉聲飛樹杪嵐氣鬱雲根慚愧孫曾志艱難涕淚痕遺編聯棣萼珍重典型存

江都符南樵

葆森

招同小東存莊遊莫愁湖

昔我曾遊此與君今又來六朝香夢冷一水野荷開小艇迎斜照秋風動古哀漁歌閒唱晚湖上漫徘徊

謙齋初集

一三三

大雨登采石磯晚晴飲太白樓觀蕭尺木書壁

神湫浩蕩下岷嶓風雨蒼茫醉放謔明月初更飛海嶠危樓一角拗江波橫空畫壁真無敵異代狂名共不磨咫尺青山思小謝笛聲吹起古愁多

九日約雲持登城西樓

又是重陽落帽辰小園秋氣暗傷神名花浚似忘形友倦鳥情同失意人閒裏養心能却病愁來無術可醫貧登高且赴城西約紫蟹初肥酒味醅

看菊晚歸喜雲屏至

城南閒看菊歸去已黃昏入戶喜君至開懷倒酒樽小窗



放明月老樹掃秋痕畫意當前悟挑鐙共細論

聽雲屏撫琴因憶遠齋

妙趣靜中得琴音隔座聽篆痕散窗白花影戀燈青此際  
寂無語開門月滿庭所思今不見寒夢落煙汀

雪夜招少白遊小輞川并索佳釀用東坡韻

愁腸百結酒腸渴枯坐挑鐙膏欲竭窗外風敲碎玉聲起  
視寒林初著雪剡溪放棹亦偶爾烟水輞川差髣髴埋香  
昔日儘風流弔古情深悲孟德今又冷翹君未知雪影波  
光幻明月倘能載酒從吾遊小艇衝寒更清絕黨家風味  
非不佳豪門怪底因人熱

謙齋初集

二四

枯木歌

毅甫晨炊市薪拾枯木古逸怪秀殆類老蘇所記  
木假山也余欲奪去毅甫難之遂以舊藏青田石

相易卽用梅宛陵韻題於側

懸疣附贅形蝸牛螺髻蟻穴環瀛洲苔蘚剝蝕幾春秋沙  
痕梳剔波紋流蘇家三峯費鐫鏤刻詩曾似先公首

長公

山詩今我見此稱竒絕移人大抵物之尤曄難奪所好易以

石有如換酒鷓鴣裘嘆汝不生岐山上得友梅梓并杻槩  
大木漸受匠人斲曷不匿跡歸林邱

城上烏



城上烏朝朝暮暮聲自呼三冬無雪土膏竭覓食空田樓  
宿麥飛鳴欲傍富兒倉恐惡此聲爲不祥乾鵲迎門爭報  
喜慈烏吞聲飢欲死誰憐返哺時啞啞情難已吁嗟乎高  
岡不聞鳳凰鳴平原不聞鶻鷁聲且隨雞鶩毋相爭一飲  
一啄安其生

李藹如

本仁

方伯以自題長江籌遠圖詩屬和

坤輿兩戒蟠山川神湫旁薄趨蜿蜒皖江設險一衣帶綰  
轂都會司中權 國家重熙恢至德化日濃膏被蠻貊寰  
海承平二百年鯨波不動江光鮮天塹之險古如此形勝  
分明堪屈指勢控荆襄居上游孤山雙柱砥中流大龍回

謙齋初集

一五

顧爭吞吐天門中斷分吳楚秦淮王氣騰龍虎紫髯將軍  
初拓土自從五馬渡江來一龍掉尾風雲開王家塵尾謝  
公屐俱是風流濟世才螭磯牛渚兩寂寞潮打三山一輪  
月寒濤嗚咽黃天蕩大江東去歌聲壯白浪空摩燕子磯  
金焦兩點餘屏障江流浩淼連外洋勝明倭寇殊披猖桓  
桓戚南塘練兵殺賊嚴江防戰守雖然馮地利治亂由來  
視人事何物墟中魂乃盜潢池兵

時粵西  
跳梁

維

皇嗣宇轉

大鈞灘江桂嶺皆吾民昨聞軍符日馳逐大農紆籌嗟不  
足 九重屢盼捷書至諸將但持道旁議我公一面當皖  
城壯志欲請終軍纓袖中舊有陰符經自恨不斬吞舟鯨



登樓遙喟烽火明酒懷戎算兼詩情寫作長江圖冠以七  
字詩揮灑醉墨何淋漓快筆直與江爭竒側聞抽練布嘉  
告公奏抽練精兵奉  
旨通飭各省更慮剽椎警頑俗獻納常防失律憂

旬宣冀沛全淮福賤子伏蒿萊豹畧間探討平生却笑馬  
服君飽讀父書多不曉澄盂拔薤有至計止沸揚湯儘滋  
擾但期巨手奠坤輿數著能教濟時了岷山高峨我大江  
自瀾瀾公才萬斛如江水飛鴉咏桑音盡革枹鼓不鳴春  
風起寄言父老莫浪憂君不見我公何如元道州

懷栗春坪烜師時奉諱家居

瓠子歌成述舊勛

謂恭  
勤公

懸魚堂畔繼清芬手栽桃李成陰

謙齋初集

二六

久歸傍恒山卧白雲

地震

稽考康熙年地動經頻頻豈惟驚畿甸直達晉與秦屋廬  
數千里傾圮無一存死者如亂麻存者鼠狼奔聖人避殿  
憂下詔沛殊恩大開瓊林庫築室招流民迄今二百載四  
海安耕耘恠事忽又發夏四月初旬黑霧從西來白氣相  
吐吞兀坐疑人推搖蕩卧且躡訇然街市闕竊恐乾坤翻  
虛全救月蝕我亦蟻蝨臣天門跌蕩蕩異事誰賓陳所賴  
賢牧伯上體堯舜仁催科願少衰僵痿客一伸茆簷慶旣  
宅穗秭敢辭勤金柱永堅靜壽康樂窮邨



訪小吏港

彈指滄桑幾變更城東一水自盈盈長篇樂府空今古艷  
說廬江小吏名

讀阮詩

文人慧業數偏竒我獨傷心魏晉時  
解道猖狂爲至慎詠懷深愛步兵詩

讀陶詩

挂印羞爲彭澤令歸來老作葛天民  
自題五柳先生傳誰識千秋血性人

讀劍南詩

謙齋初集

一七

南渡詩人首放翁豪情壯志付秋風  
拚將家國無窮恨都寓田園雜感中

書小倉山房詩後

誰從風雅溯根源嘉道而還僞體尊  
不識隨園真佛力紛紜衣鉢墮禪門

小輞川棹歌

逍遙津孫曹鑿兵處在城東隅中有邨四圍多槐  
柳道光庚寅家大人拓地數畝種花竹結茆津上  
爲大父宴息所越數載圯於水己酉春復修葺之  
顏曰小輞川命辰偕諸弟讀書其中暇則泛舟垂



釣或繞徑行吟與園叟漁丁笑呼爲樂咸豐初元  
自白下歸約宋山人雲屏作圖因成棹歌四十首  
以補圖中景物之缺

門島池邊小鞦韆年年三月水如烟桃花紅漲春波緩細  
雨斜風泛釣船

幾日波痕沒埜谿逍遙故址浪平堤依稀綠到藏舟浦草  
長春深鶯亂啼

平疇雨過綠初勻麥浪層層接水濱更喜菜花風旋起黃  
金滿地莫憂貧

一樹棠梨冷暮雲紙錢風緊雨絲棼可憐城畔高低塚更

謙齋初集

二八

有何人來上墳

破壁苔紋近水均空梁塵網挂蠨蛸晚風入戶簾痕動燕  
子銜泥認舊巢

坨南坨北界煙渚隄短隄長隔柳條行到水雲最深處百  
花影裏小紅橋

栽得桑麻蔭四鄰那知憂旱更難辛一犁夜雨園蔬長新  
買豚肩賽社神

雉堞迴環儼畫屏鷗波浩渺接空亭施洲舊跡今難辨考  
古還思注水經

解下筠籃放釣筒櫻桃樹底立當風女郎掩口殷勤笑爲



指枝頭色更紅

喧喧蛙鼓鬧深宵  
蟹舍漁莊慰寂寥  
隔岸桔槔聲不歇  
引來新水養魚苗

笑語喧爭聚岸旁  
銀刀上水繫垂楊  
兒童拍手羣驚起  
老鸕銜魚過女墻

剛口高平飛騎橋  
春來江信始生潮  
孫曹戰迹無人問  
賸得城東路一條

飛騎橋在津上

波影清連小吏港  
濤頭直到子胥臺  
英雄兒女空陳迹  
惟有沙鷗自去來

津水通小吏港  
濤子胥臺

凍雷昨夜雨霏霏  
驚笋抽芽出土肥  
盼到貓頭君莫兇

謙齋初集

一一九

篁散影抱槩歸

瓜皮艇子響呿呿  
有客初來處士家  
却笑盤殮無別味  
自提絲網去撈鰕

早起鋤瓜四月天  
綠槐高處望炊烟  
漁兄漁弟爭呼伴  
釣得魚來換酒錢

編就蘆簾自在眠  
北窗一枕小遊僊  
醒看稚子閒無事  
戲搗蛛絲暗捕蟬

折得紅蕖向碧淨  
花開花謝最關心  
凌波欲步盈盈水  
試比儂情深復深

碧水空明蕩槩過  
蜻蜓也解點輕波  
怪他打鴨偏多事  
驚



醒鴛鴦喚奈何

迎秋雨足稻初肥  
花落紅蓮香四圍  
數點星光忽明滅  
夜來時有水螢飛

菰蒲動影破潭煙  
收拾笞笞水上眠  
箏笛不聞漁唱晚  
埋

香何處弔嬋娟

箏笛浦  
卽此地

亂葦叢中水一涯  
城陰迴抱有人家  
幾條破網當門晒  
分得斜陽上蓼花

墩換香花舊宅荒  
鳳凰巷口跡茫茫  
包家久與齊民伍  
踏

藕又魚一例忙

包公故宅在城內小鳳皇橋巷有墩曰香花類泚公讀書處今存尚節樓祀包子婦

峯氏城南一邱本梵宇明時改爲包公書院後爲家廟香花之名遂移

謙齋初集

三十

返照譙樓乍放晴  
豆花棚下晚涼生  
三盃軟飽風前卧  
悶聽秋場打稻聲

偷窺荷鏡蹙修蛾  
懊惱吳娃恨轉多  
絡緯有聲天欲暮  
月明齊唱采菱歌

獨跨疲驢盡日遊  
溪邊楚趣愛勾留  
斜抄小徑穿林過  
霜柿如拳悞打頭

階前隙地拓三弓  
閒向西風種晚菘  
老圃秋深籬落冷  
飛寒蝶埜烟中

枯蔓盤窗木葉飛  
秋蟲寂寂掩柴扉  
偷閒搖舫前頭去  
滿

載黃花共蟹歸



烏桕丹楓閒幾重樓臺深處碧雲封尋秋信步渾忘遠古

寺天寒響暮鐘

教弩臺羅漢寺地  
藏寺皆唐宋古刹

衰柳蕭疎野水寒一行雁影落荒灘蘆葑風捲花如雪小  
艇藏人偷下竿

脫却蓑衣堆樹根相邀鄰叟話前邨秋林缺處城西望一  
點山光綠到門

方塘飲馬日歸遲水面雲低欲雪時忽聽亂鴉聲起處乞  
兒吹火傍荒祠

寒柝沈沈夜未明板橋路滑少人行不知水響緣何事小  
犬迎門有吠聲

謙齋初集

三二

築土爲牆草蓋廬野人家計禦冬初卽看溪嘴寒梅放曾  
記衝寒手自鋤

黃昏飽飯繫孤篷歸去圍爐草閣中袖出新翻漁釣曲吟  
殘芋火夜深紅

聚星堂裏門吟牋禁體爭誇得句先不獨詞壇添韻事花  
飛六出兆豐年

松篁隱隱結茆庵鐙火青熒伴客談憶否莫愁湖上過經  
營畫稿放江南

小隱城東遠市囂潛夫蹤跡近漁樵菜根滋味閑中嚼清

白家風歷四朝

余家自此  
宋時居此



維摩十笏水中央，隔斷紅塵鷗鷺鄉。  
管領四時好風景，看花怎及著書忙。  
天將雲水寄閒身，拋却浮名愛隱淪。  
課雨占晴無一事，此生合是灌園人。

壬子春夜宿南村與赤芳宗老雨話

春早日如血，塵飛熱風吹。短麥未三寸，種黍將失時。  
布穀枉自喚黃雀，浪相隨。五更被涼冷，簷溜傾。茆茨懸知原，  
外波濤捲塘陂。終年公私急，精力耗鋤犁。輸官有餘粟，不救室中饑。  
得雨喜復悲，淚下如連絲。未學絕粒法，烟火惱沈脾。空中良泌笑，亦安用食爲。

謙齋初集

三一

七里河待渡

趁墟小聚岸沙邊，渡口無人待放船。  
附郭魚鮮爭入市，傍山水足早耕田。  
嵐光破日沈花塢，露氣侵晨養麥天。  
欲向七門尋廟記，囊中尙有拓碑錢。

劉貢父有七門廟記

梅心驛訪觀音洞

懸岩空鑿洞老樹，卧生春卽此天然境。  
常留自在身好山，堪入畫仙尉喜爲鄰。  
擾擾紅塵裏，應嗟行路人。

山行望二姑山晚飲村舍作

挽葛拾磴道悄然，窮險危青霞向空盡。  
仰見雙蛾眉香澤，蘭芷異仙跡。猿鳥知午迷謝靈運，晚繩韡退之。  
欲投華陰



宿竊慮永嘉疑下山訪荀媪明月生

柯城道上

酒旗風捲落花飛  
埜鳥穿林語翠微  
香散麴塵攪細雨  
煖催柳絮撲征衣  
山荒田少耕牛瘠  
草長春深驛馬肥  
共道守官多善政  
此邦民氣異淮淝

楊柳曲

桐城道中種楊柳  
往來攀折行人手  
長堤三月麴塵香  
春老飛花滿店傍  
隨風颺蕩沾衣裳  
君不見陌上桑  
自亭亭澗中蒲  
何青青草木生  
來有本性莫學楊花無定形

宿集賢關

謙齋初集

三三

幾點燈光出晚村  
數椽茅舍枕山根  
槽兒迎馬爭當路  
壚女招人慣倚門  
雲氣漸收清似水  
月華初吐大於盆  
輕裝未把征塵拂  
先解奚囊倒酒尊

大觀亭謁唐元余忠宣公墓

我亦青陽住來尋  
皖口祠溝聲崩岸  
險山勢劃江竒窈窕  
孤亭晚蒼茫百戰悲  
巍然一抔土愧煞老臣危

與吳蘭軒

延香

年丈登迎江寺塔書懷

滾滾洪濤萬里風  
與君高唱大江東  
不徒弔古傷春意  
都付荒烟落照中  
地接淮徐民力敝  
烽傳楚粵戍樓空  
書生籌國非逾分  
後樂先憂願本同



雨霽涵春樓晚眺

濕雲埋斷岫驟雨響晴空江氣吞天白霞光飲水紅帆檣  
飛鳥外吳楚暮煙中極目思千里高歌倒酒筒

飛鉢庵遣興

肥水皖山相接壤離家爭奈百愁侵禪房小住日無幾物  
候忽驚春已深客邸鶯花紛過眼故園松竹最關心漫言  
三月鱖魚美彈鋏羞爲遊子吟

天然居小飲遇雨晚晴遠眺隔江諸峯

白雨斜飛猛氣吞黑風倒捲怒濤奔此時放眼空塵海無  
數名山到酒樽日落長天江影浚雲歸深樹鳥聲喧我來

謙齋初集

三四

小閣拳簾坐指點孤帆過遠村

望投子寺

孤雲何處飛野鶴獨來歸日午無人影鍾聲冷翠微

午憩松下

日薄雲無影山空翠濕衣深林竦雨過時有妙香飛

曉過峽石關懷唐秋谷

晉錫

少尉

未足還鄉夢勞勞送馬蹄曉烟籠樹合殘月挂峯低人語  
響空谷鍾聲渡埜溪晨門懷吏隱怕聽守關雞

歸家三日又有彭城之役

餘糜花過始歸家草草勞人悞歲華鄉夢未濃春已去又



隨飛絮到天涯

早行

繩牀難穩睡襪被事長征客去還局戶驢鳴自識程曙光  
分月色鳥語雜雞聲夾道多楊柳行行已近城

鳳陽晤李蓮坡

士葵

屯守

短李亭邊路驚看太瘦生恰當風雨夜各訴別離情對酒  
須同醉明朝又遠行淝津雖有夢流不到淮城

遊第一山龍興寺

第一山頭選佛場當年託跡禮空王卽今殿角生春草依  
舊鍾聲冷夕陽天起真人成大業地無王氣繞淮鄉袈裟

謙齋初集

三五

度牒殊多事傳世何堪有讓皇

重至臨淮旅舍題壁

一曲驪歌踏軟塵故園小別已兼旬宵來欲作還鄉夢淮  
水無情又送人

宿州道中

撲面塵埃黯不分羈懷抑塞共誰論空囊遠道愁難盡獨  
客傷春酒易醺新水一畦鋪碧毯夕陽萬頃刈黃雲勞勞  
翻羨田家樂牧笛農歌到處聞

山行謁閔子祠呈鄧梅卿

世亭司馬

路入淮徐境塵沙百戰場天寒春寂寞山古色蒼涼善俗



居民儉清時邑宰良停車問遺墓一水繞祠堂

周制府公座上晤臧丈牧庵

紆青

孝廉

投筆當年憤請纓誰知報國有書生文章腹拄五千卷經  
濟胸藏數萬兵燕市驂騮悲沮喪楚天瓦礫任飛鳴烟塵  
未靖英雄老借箸空談細柳營

自白沙嶺雨行至集賢闕訪完白山人鶴塚

行到龍眠破笑顏那知身在畫圖間雨絲垂地青纈水雲  
氣粘天白蓋山一杵鍾聲投子寺四圍松翠集賢關摩挲  
妙墨尋遺塚鶴放寥寥去不還

伏日偕方蘊山

昭文

年丈避暑程蘄山

荃

篆隱園

謙齋初集

三六

難覓阿蘭若閒過市隱居登堂締葛解沃水垢氛疏檻外  
聞言烏池中見畫魚冷淘當午設清簞近風舒壁挂倪黃  
墨家藏斯邈書琴聲養疾後花氣破禪初對客談名嶽知  
君憶舊廬白雲三十六鄉夢比何如

登射蛟臺

大龍山勢拓江開落日寒潮萬馬來回憶當年射蛟處離  
離秋草沒荒臺

舟過池州

蘆中人語夢初醒一霎風帆過遠汀柔艣數聲殘月墮九  
華山色隔江青



曉泊荻港弔黃靖南

櫓聲搖夢斷問境到繁昌  
江市人烟聚山祠草木荒  
時危乘閣主事去殉殘疆  
咫尺巢湖近英魂認故鄉

無爲卽事

聞道居民苦頻年遭水荒  
倉空誰糶粟詔下免輸糧  
魚兆占今歲鴻飛返故鄉  
稻孫樓在望尙憶米襄陽

晚過巢湖風雨暴作夜半放晴泊中廟

紅日墜地天垂斗買舟徑出龜山口  
玻璃萬頃盪星光擊楫高歌醞濁酒  
恠雲一片從東來雷聲突起南山隈  
蛟龍哮吼驚出歿波濤怒立船頭埋  
是時四顧黑如墨舟人對

謙齋初集

三七

面俱失色棹轉中流蟻磨旋風曳孤帆  
收不得須臾雨過風浪平月華照影孤  
山明夜半推篷何處宿懸巖古刹飛鍾聲

湯雨生都督招同周遠齋看荷雨不果往却寄

我別小輞川茵替正紛敷芳香役魂夢  
十日還踟躇將軍曩解組選勝來南都  
買山傍謝墩高風追鏡湖蓮花過人頭  
凌波千名妹銅斗飲江酒醉倒樵青扶  
想像獅窟邊一曲成畫圖折柬忽見招  
同作高陽徒準擬憑水檻窈窕開清臚  
飲酌信前定風雲變須臾遙知座上客  
拍手相胡盧本無散仙福雲錦謝平鋪



梅伯言

曾亮

先生招飲卽席賦呈

治城寄圃極瀟灑先生更避悠悠者却喜著書尊白鹿不  
慣居官策羸馬筆精詩力兩無敵投贈紈牋動盈把揚雄  
詞賦似相如君房言語妙天下憶昔傳薪抱軒座中郢  
曲知音寡劉孟瑩先生管異之先生還應讓出頭方植之姚石甫先生  
許稱同社當代文名重斗山四方講學培梧櫛將軍都督  
說士甘於肉何幸頑金得爐冶片詞隻字賴推敲長歌短  
篇愛傳寫縱談勝負齋房芝濡墨類乾銅雀瓦每陳鮭菜  
醉深宵健僕觸屏銀燭炮譬彼蹙驢勿輕捨昌黎門下逐  
東野

謙齋初集

三八

同吳幹臣

其楨

國學劉珮卿

瑤

上舍張瑾山

瑜

選貢

泛舟秦淮

柔艣聲中笑語新盈盈十五不勝春多情留取鷺鴻影長  
伴烟江載酒人

過欣園懷馮丈晉魚

啟薰

太守

重訪欣園有淚痕縐雲峯下記開樽西風掃徑秋聲急醉  
卧斜陽老樹根

同長沙李雨生

恩霖

甘泉程劍庵

廉

上元陳岳樓

學

王蔗香

金洛

高郵薛雲侯

國慶

小雲

成榮

寶山蔣

劍人

敦復

盱眙汪稚松

根蘭

含山巖仿石

恪

桐城



許叔平奉恩遊獅子窟聽仿石鼓琴呈雨生都督

同遊獅子窟來訪故將軍曲徑入幽邃閒身寄水雲花間

欣讀書都督出觀雙湖夫人畫梅被圖座上細論文更有移情處琴音隔

牖聞

### 重九日登卧牛山

巢湖萬頃捲波濤獨立峯頭興更豪漫道良辰偏作客偶  
來勝地且登高霜飛木葉千山瘦風急雲霄一雁號遙憶  
家園兄弟輩菊花影裏醉持螯

### 閭警

擊楫空傳壯士歌誰能隻手挽銀河忽聞萬櫓紛螻蛄太

謙齋初集

三九

息千羣化鶴鵝五夜風聲軍膽落九重露布捷音訛岳陽  
樓上悲笳急湘水連天湧怒波

### 悲秋

不爲悲秋百感深關山入望氣蕭森天高風散千林蕩寒  
重霜凝大地陰過眼雲烟驚夢幻趁心歲月任浮沈吾生  
敢道匡居樂抱膝終慚梁父吟

### 壽春道上

朔風吹積雪獨客事長征野曠無行迹林荒有凍聲寒烟  
凝水黑霽色射山明觸起鄉心遠寥天雁唳清

題懷遠楊丈蘭坡

廷甲

戴笠圖



久被儒冠誤勞生白髮多文章增感喟心智惜蹉跎  
得佳法偷閒且嘯歌欲呼元真子結伴向煙波

嘉平朔自壽春至冶溪子箴止宿半園邀同楊小坡

組榮

合弟子應

潛孚

子巖

潛圃

雪夜小酌卽席感

事一百韻

朔雪滯行客解后輒相遇冶溪結凍漸淮山凝宿霧歲晚  
動遊興壽春往來屢大將正出師祖餞盤飡具

思總或出防九江同

人祖餞於琅玕山

琅玕拓酒陣荆湘走露布妖氛警風鶴烽烟亂

江鷺州郡急徵調壯勇徧招募老兵汴岸旁荷戈不肯渡  
自言歷戎行辛勤事征戍袍濡戰血殷戟淬農器鑄旌旗

謙齋初集

四十

雜茶墨藁砧搗練素束髮隸卒伍光陰倏殘暮頻年驕龍  
蛇浮家渺鷗鷺丁男悉供役哀朽復誰顧黥浚小孤峰槍

側忠宣墓皖江據要隘紛紛議防駐十室九已空脂膏竭  
財賦朝廷宵旰切草墊倉卒赴生還分無期淚灑河干樹

牽衣告同澤行行復却步側聞老兵語頓令狂生怖愁城  
攻不破醉鄉忽驚寤寤長揖謝八公把臂欣再晤問客至何

晏懷抱各傾吐菊所引鄉思

子巖會屬尚在東流

桃根溯前度槳破

青溪月屐碎銀塘露香國日逡巡詞壇樂依附魂銷秋士  
詠才艷冬郎句品藻希大雅蘊藉得真趣遙憶浮槎麓方

岳尙羈寓

子箴七月來泐余赴白下

不登教弩臺不訊香花路逍遙竟



虛艱勾留屬何故風氣漸澆薄交遊動觸忤登場優孟尊  
識字錢虜妬衣錦笑沐猴營窟歎狡兔錙銖巧翻覆然諾  
自抵牾但求飽囊橐一任誚執袴轉餉費鉤稽安省籌戶

居奚恐懼久矣故人踈違畏宰官怒游泳釜底魚剝蝕木  
中蠹未醒蚍蜉夢枉學螳螂捕朱門競烜赫勢倖積薪厝

舉世多肉食覲然半羶慕祗緣拙似鳩遂致渴如鮒白下  
幸過旋佳賓亦小住周權遠齋文字契宋廸雲屏烟霞痼

相將挈壺榼泥飲攬市酤攤絹下雙管撫絃絛一炷畫理  
與琴韻玩索兩無斲宿草感延陵黃花瘦老圃言訪倚樓

趙雲持載向輞川沂銀鱸配蘇芎玉螯點薑醋蝸篆壁閉

謙齋初集

四一

題庚戌三月諸同人聯吟

禽飛村外味幽栖發遐思曠懷屏世務視

彼憤憤徒焉足繫好惡即景且怡悅毋爲歲月誤荏苒屆  
冬孟澄潭曉霜涸林絢丹楓纒徑冷白雲屨策蹇早歸來

虎兇畢婚娶哲嗣行冠禮弱冠握鉛槧博議好賡註和鳴叶鸞

鳳騰驥軼騏驎開樽緬孔融下榻款徐孺半園恣眺覽先

型敬延悰子箴伯曾祖觀蔡公讀書處觀察曩解組堂構式垂裕累葉

誦清芬高躅滌塵污傳家守青箱豎幟慚武庫崔盧重親

情嵇阮雅存注茶沸蟹眼活竹曼鳳尾互暗香散蛟奔圓

吭脆鳥嘯老輩此觴詠仙音播韶護乙巳春尊前蓮舫太

半園令喚句摩挲墨跡在珍重碧紗護深愧伍樗櫟淪棄等匏



瓠顏色遜嬌施塗抹外脩嫖涇渭混清濁糟粕強啜舖名  
場幾顛躓欲叩真宰訴金鼎丹九轉水犀甲七屬終須攝  
桂魄爭羨聯萼跼毛錐論功細長劍奮先驅鯨鯢晝噴欲  
貔虎夜叫諱岳陽戰鬼雄洞庭墮陰沔粵隄人定天可  
勝胡爲諉氣數抗念范老子制軍 永悲羊太傅制軍

軍糧諸葛萊相業鄴侯芋投筆謬請纓求賢孰吐哺大令  
善折腰將軍甘辱胯蟲沙墮浩劫鋒鏑死亡苦維 皇振  
乾綱八荒服舉錯星芒斂弧矢天膏霈霖霖宥密 九重  
運陽和萬物煦跳梁易殄滅凱旋高福胙銘勳書太常告  
廟賜大酺化宇普熙皞文囿快騁驚止戈兵革息釋褐俊

謙齋初集

賢顛底事嗚不平賡歌罷諷諭寒宵斗室坐白戰壁壘固  
姜被詎暇温褚穎速抽恬癡絕捧硯奴寂無解詩嫗擊鉢  
鴉漫塗聞鐘雉俄响聚散本靡定慷慨天所付臨歧更惆  
悵遙空雪仍雨

癸丑人日卷石山房題壁

春酒頻斟獻歲卮草堂醉起日遲遲且偕弟妹同歡笑怕  
說干戈易別離大地雲山驚慘淩累朝民物託雍熙書生  
愧少佳時畧聊續元和諷諭辭

登壇吉日賦車攻寵錫彤弓望愈隆黃閣訂謨多睡語黑  
衣祈禱冀神功蠹天烽燧連江上匝地蟲沙化粵中三載



智囊無一計斷籐戰績羨韓公

白晝陰霾戰氣昏荆湘亂後幾家存凍蘇碧血埋僵肉  
泣青燐嘯餒魂春燕巢林仍覓主老烏啄屋漫投村監門  
繪出流民狀却恨無由叩帝闈

設險謀攻古法亡承平久自缺軍防眾多烏合如兇戲陣  
失魚麗弔國殤幾見同仇羅雀鼠翻虞借寇畜豺狼紛紛  
惡少新招募大府兵符速啟行

皖公半壁倚長城設局新標保衛各未按輿圖誰聚米坐  
揮塵尾浪談兵上游已失藩籬固下策徒勞鐵鎖橫整頓  
乾坤須巨手道旁築室總無成

謙齋初集

四三

大農仰屋費持籌轉餉誰紓軍國憂猶記先朝蠲賦稅其  
如諸道急徵求臺端竟少鷹鷂逐窟室尤深狐兔愁載咏  
春陵書憤語幾回掩卷淚橫流

萬姓魚頭涕泗多垂龍跋浪走渾河

去歲河決豐縣

齧桑莫禦桃

花水墮竹空留瓠子歌忍把金錢填壑谷誰沈圭璧靖風  
波斷齧偉烈今難再敢道蒼天易薦瘥

吳魏雄爭舊戰場巍峨重鎮首廬陽星分牛斗光芒聚勢  
控江淮襟帶長疇昔民風原質直於今鄰境更疆梁救時  
自有新條教保甲焉能泥古方

哀矜無告痛呼天折獄難將片語宣不幸一夫行草竊可



憐十室坐株連蛙浮涔水喧呼伴鼠據官倉暗弄權百里  
巢湖憑作獺渠伊又索捋鬚錢

布政端如網在綱補袞要著是官常椿樗本自殊優劣蒼  
赤從來固保障欲使窮簷聯臂指但須葑屋足倉箱黑山  
中夜傳風鶴臨渴匆匆掘井忙

白屋朱樓變幾番吾家尙有典型存濫居學校名爲士記  
取君親要報恩一飯不忘歌帝力半瓊常在守清門風流  
文采希前哲本是烏衣舊子孫

局勢紛更等奕棋河山舉目不勝悲浮生久已夢胡蝶世  
事何如食蛤蜊十笏清閒摩詰地一編涕淚少陵詩愁中

謙齋初集

似覺春光早新柳垂垂綠幾絲

正月十六日送毅甫移居湖干

久作浮家計行行放櫂遲貧同王錄事難潤草堂貲

楚皖新謠

洞庭飛渡岳州陷趙幟漢幟溷真贗羽書盼斷衡陽雁督

師帶甲滿湖湘徒誇十萬橫磨劍徐爵帥廣緒  
擁兵駐衡州

毒烟夜漲漢水明鸛鵝萬隊亂軍聲擁兵坐困武昌城誤

學火攻真下策腹燈莫謾怨蒼生常撫軍大濬火民居  
人心洶洶武昌遂陷

鐵鎖燒紅斷江水風鶴蒼黃驚欲死一夕扁舟歸去矣將

軍免胄逐波臣肉食者誰真可鄙唐制軍建瀛自九江  
退總戎恩長投水死



黑風狂哮陰雲凍小孤山前蛇豕鬩槐國衣冠猶寤寢封  
章朝奏九重天遊魂夜向泉臺慟十七日蔣撫軍文襄奏陳防守是日城陷

典史平源死之

得文斗垣

漢先

年丈消息

浮渡山中薇蕨肥樅陽江上羽書飛伯休賣藥君平卜溷

跡人間胡不歸

小園桃樹作花

小桃有紅意欲試可憐春開徑初經眼無言暗愴神回思  
絃管日長憶亂離人擬泛仙源棹何從去問津

三月三日訪毅甫湖干

謙齋初集

四五

一篙何處訪仙蹤迷路桃花春意濃夜雨驟添平岸水曉  
烟新染隔湖峯閒觀世事紛塵馬賸有豪情學醉龍莫話  
青溪翻懊惱舊時樓閣化爲烽

東阿周公奉

命撫皖奏廬州爲行省李少荃

鴻章

編修孫引恬員外隨呂鶴田

賢基

侍郎回籍團練

先後莅肥喜賦

棋局紛如此誰爲戡亂才煙塵天地暗元老鬢毛摧賴有  
中流柱深虞大劫灰諸君重桑梓新捧詔書回

送引恬之潁州

遠別驚烽火喜君天際來浮生休問命君精數學亂世亟需才



我亦憂桑梓權難屬草萊羽書又催去愁勸掌中盃

偶經笑園松已伐去惟石尙存

笑園十畝敷清陰團焦趺坐彈素琴阿誰徙向東嶺去五月松風何處尋無端老公受大斧惟餘玉女拋泥土韓山一片亦可憂大姓墳前要羊虎君不見定山堂裏子姓稀孤松偃蹇枯無枝又不見文定門前雙石貌欲掘置解根難移華屋山邱同寄慨長願窪樽穩如岱醉聞酒氣聽酒聲忘却笙竽兼沆瀣

畫蘭行 有序

畫蘭女子陳佩琴字友香爲吳少香養女少香負

謙齋初集

四六

俠氣善相人非名流弗交佩琴亦敏捷知書工度曲年十六從少香居簾影樓樓故香君遺址院小而潔疊瘦石旁藝花竹性狷冷不好鉛飾日與筆墨爲緣尤喜畫蘭顏所居曰香隱座右懸湘蘭小幀落筆頗得其意趣顧常自珍惜不輕持贈咸豐壬子秋仲偶過從遂心許焉戲投以詩時時吟諷不去口若深眷余者旣余試畢將歸設餞樓頭卅飲訂歡酒酣屬妹子佩霞吹洞簫歌長生殿一闋音節淒婉曲終離席而起曰阿等飄零亦何足惜如君輩磊落才久困風塵閉爲可喟耳座中人相



與賦詩欲戲罷去夜既闌剪燈調色取舊帕寫蘭  
數枝曰聊以爲報少香爲誌年月同署款畫尾綴  
以小印約他日重來好持作證也歸而秘諸篋時  
一展玩悵惆久之今年春江宜失守金粉畫圖都  
成灰燼秦淮一片有情水更不知如何嗚咽矣偶  
檢是幅感而成句名曰畫蘭行

涉江芳草繫閒愁九曲青溪碧水流畫舫蘭橈催客起夕  
陽來訪媚香樓綠窗風定清於水眠葉低拂烏皮儿口脂  
細吮色頻調薄笑沈吟止未止畫筆傳家獨擅竒湘蘭妙  
墨是吾師芳名並寫簪花格吟緒私填織素詞蘭芽受露

謙齋初集

四七

娟娟好長觸離懷秋色老庭除不放合歡花牆陰枉種忘  
憂草同遊女伴有西施施蓉仙亦工畫蘭愛學橫波也入時昨夜

玉臺新破夢紅情綠意耐尋思蛾眉見妬風塵目鰕生別  
署藏嬌屋歡樂場中翰墨緣綺羅隊裏清閒福蒲帆西去

淚如麻木落亭臯感歲華準擬秋風忙折桂那知江月照

吹笳雨花臺畔鳴宵柝沒粉輕烟名二樓頓蕭索子夜歌殘

玉樹菱隔江人唱楊花落粵西逆首李世德滅後楊秀清諸逆繼起十萬軍無

橫草功可憐一炬畫圖空梧桐井冷燕支紫翡翠牀寒燐

火紅澧蘭沅芷悲前事騷人暗灑靈均淚於今時勢慣枝

梧一任紅花開滿地民謠有滿地開紅花指僞太平王洪秀全盼到歸期已及



瓜長征戰士未還家  
颯零痛惜將軍樹

謂祥

狼藉空嗟姊

妹花

賊擄女子  
分妹姊韻

六朝金粉俱灰燼  
寸縑尺素餘蘭訊  
蠅點

疑污舊涕痕  
螺紋尚認殘紅印  
回憶良辰快舉觴  
一枝穠

艷冠羣芳吹簫  
么鳳釵頭顫度曲  
雛鶯葉底藏人亦如蘭

宜服媚花如解語  
應含睇露根寫照我猶憐  
當戶揮鉏君

勿記薰香摘艷門  
吟牋剔盡蘭膏倍惘然  
採藥劉晨

那卿

殊繾綣詠花張籍

堉山

故纏綿榮枯瞥眼原難定  
色色空

空兩無證欲采芙蓉有所思  
漫持芍葯將誰贈  
斷梗飄蓬

忽別離此生孤負月圓期  
倘教渡口迎桃葉  
重向樽前唱

柘枝帽簷插處人依舊  
香魂縹緲牽羅袖  
並蒂終須化白

謙齋初集

蓮相思偏易生紅豆  
古錦裝潢艷影留  
輞川詩卷共藏收

禪房合供黃磁斗  
玩器常盛碧玉甌  
燭天烽火何時了  
香

國花盟種煩惱  
惱蘭摧蕙折最堪傷  
果否黃絕真入道  
悟徹

蘭因更渺茫  
懺除綺語笑王郎  
好將一幅紅心草  
便當桃

花血淚香

遣家僮除園中蕪穢

梅雨園中荒人跡  
隔絕久螻蚓上堦  
吟蝸牛循牆走蠨蛸

挂庭除莓苔  
生座右花畦浸水蕪  
竹欄委地朽早起  
命僮

僕扱箕袂拘帚  
拂塵布几席捲簾  
啟戶牖罽網惡羅  
織籐

蔓苦紛糾爲我盡  
芟夷毋畏刺傷手  
埜蒿雜佳卉邪正詎



相耦偶爾事區別便覺判妍醜眼界豁然新崇朝蕩污垢  
好風吹煩襟開徑盼良友

接雲持書詩以答之

別君已匝月喜得數行書垂老兼多病攜雛暫寄居囊空  
瓶乏酒歌罷食無魚謾學昌黎叟門懸結柳車

秋夜懷人

相思不見已三年猶記河梁話別筵妻子饑寒愁欲絕關  
山阻隔信難傳由來人世輕儒素况復疏狂少俗緣此日  
鬢毛應變雪苦吟淒惻太湖邊

崑山徐竹香茂才

紛紛絲竹動離筵紅燭青樽記隔年好友如雲偏易散良

謙齋初集

四九

宵見月又重圓柝聲屢斷還鄉夢酒債應分賣畫錢扇底  
秋花留別恨憐君持贈意纏綿

長沙李雨生孝廉

怕說揚州月二分故人蹤跡等浮雲料應泛宅尋鷗侶何  
處緘愁寄雁羣翰墨前因成夢幻烽烟今日異傳聞鍾聲  
夜打迎江寺皖水歸舟記送君

江都符南樵孝廉

去秋訪我秦淮上對酒酣歌醉月明意氣縱橫談往事管  
絃拉雜變離聲河山小別滄桑感生死難忘故舊情更有

師門助惆悵

謂潘少伯先生夢魂飛過石頭城

上元王蕪香茂才

客冬風雪共登樓回首他鄉感舊游已分窮愁難作客况

逢離亂易悲秋張衡漫賦無家別王粲常懷卒歲憂遠望



環滁好山色征鴻消息久沈浮

滁州張璋  
山明經

病起

久病愁陰雨曉晴秋氣涼蓼花紅上屋蕉葉綠過墻結網  
蛛偏巧勞生螳更忙漏痕懸四壁重理晒書牀

農夫嘆

一牛卧樹陰一蟬鳴樹巔柴門日傍午穉種來中田農夫  
共我語此邦幸有年江淮屢構兵室家無完全阡陌生荆  
棘墟里斷人烟饑鳥號惡木潛鱗枯重淵老弱甘餓死造  
物豈有偏榮吝難自料滄桑易變遷今朝得醉飽聊以娛  
目前杲杲天中日仰視增煩煎

謙齋初集

五十

逍遙津泛舟

斜日挂榆柳放舟破暝烟小垵轉紆曲碧淨波光妍紅衣  
影倒亂扣舷歌采蓮溪荒境尤僻秋氣何淒然斷葦風蕭  
蕭歸鴉相後先甕中有美酒雪藕烹新鮮舉杯忽見月狂  
嘯呼酒顛側聞東城頭桴鼓聲淵淵

得周遠齋書

偈仄對窮秋孤吟惡懷抱隱几據榻梧偃仰思顛倒紫鴿  
曬斜陽黃蝶掠秋草東南障煙霧私心怒如搆達士先見  
幾歸向山林早昨日得茯苓緘書述幽討招隱有深情一  
枝巢更好人世半沈溺毋爲利名老便跨秃尾驢同訪丹



邱道

過吳菊坡丈故居

羅雀山房久無主，隔巷鄰雞猶報午。  
朝川無復裴廸來，斛斯不訪城南杜。  
昔年共取北窗涼，箕踞胡床話今古。  
翁化鶴，竟不歸。至今蛛網懸門戶。  
長蕉瘦柳尚依然，暮蟬聲聲淚如雨。

逍遙津夜坐感懷伯韞

蕭蕭風起荻蘆汀，水閣無人夢易醒。  
月洗露光千樹白，香溫簾影一燈青。  
寒生疏竹搖清韻，秋瘦幽花養淨瓶。  
研墨緘愁何處寄，夜深絡緯不堪聽。

謙齋初集

五一

中秋

銀蒜低懸獨倚樓，木樨影裏又中秋。  
三年三醉金陵月，併作今宵一枕愁。

同人觴李少荃於教弩臺余因醉晚歸

時事艱難枉告哀，與君一見笑顏開。  
九秋風物陶清興，百戰河山產霸才。  
出岫閒雲將作雨，登臺落日共銜杯。  
禪關寂寂松陰冷，歸去城頭鼓角催。

秋感

彤庭日盼捷書馳，虎節巡江議出師。  
薄海軍儲勞供億，行營甲仗自委蛇。  
螭弧晝閃星芒動，鼙鼓宵沈秋氣悲。  
多少



蒼生齊引領猶言天下係安危

聞道長沙未獻俘  
貔貅又復擾洪都  
魂銷秋夜瀟湘月  
夢醒春風蚊蝶圖  
離亂小民輕骨肉  
崢嶸大吏重頭顱  
請纓投筆英雄事  
市井功名賤狗屠

皖江門戶已全空  
枉築東關塞巨艚  
狡兔善藏先得計  
驕鷹飽去反論功  
李膺位望推仙侶  
張湛聲名負聖童  
屈指漢庭諸將相  
絳侯年老尙稱雄

詔書哀痛求民瘼  
宵旰關心廟算長  
久已熊羆殷夢卜  
無何鵬鷲任飛揚  
大江波浪吞天白  
中土風沙捲地黃  
將士幾時臨戰壘  
指揮慎勿誤戎行

時賊據江甯  
芬甯河南

謙齋初集

五一

橫海

截江門戶狂瀾險  
橫海樓船殺氣高一自中朝通玉帛  
漸教西法變泉刀  
誰知引虎終貽患  
獨悵亡羊未補牢  
回紇縱然思助順  
功成何以答勳勞

草堂

草堂地僻少人跡  
閉戶下簾清晝長  
寂寂鳥聲初醒夢  
蒼蒼竹影暗移牆  
澹懷自覺世情遠  
默坐不知秋氣涼  
倦起拋書閒散步  
樹林笑看白雲忙

綠夢軒睡起

幽夢尋無跡  
斜陽冷上堦  
蛩音如有恨  
似訴落花埋



詠柳

手種牆西柳依依已六年秋來半搖落不盡爲情牽

金陵雜憶

波濤滾滾夕陽紅蘆荻蕭蕭戰壘空記否閱江樓上望千  
秋能有幾英雄

烟嵐萬狀隨時變樓閣玲瓏聳碧雲記否棲霞好圖畫  
他著色李將軍

御溝水洞沸官蛙輦道煙沈落草花記否禁城尋勝迹  
斷殘鴛瓦野人家

中山勲業並蕭曹勝國簪纓甲第高記否大功坊底路更

謙齋初集

五三

無石馬卧蓬蒿

布金創就梵王宮畫棟飛甍氣象雄記否長干千仞塔木  
魚聲裏佛鐙紅

參天松栝翠交加木末亭孤一徑斜記否雨花頻策蹇汲  
泉養石更煎茶

冷冷埜水雜菰蒲粉墜蓮房泣露珠記否莫愁湖盪漿黛  
雲眉月恨模糊

濕雲一片下臺城元武湖邊眺晚晴記否雞鳴聽說法荒  
唐塵夢醒鍾聲

輕烟沒粉遭塵劫香夢迷離舊板橋記否秦淮秋夜月碧



天如水按紅簫

當年風雅希前哲此日林亭付子孫  
記否隨園恣遊覽買山須傍謝公墩

鄮樂山

懷仁

自江寧歸出示近作

驚看君自賊中來塵髮愁顏語更哀  
草盡兔狐悲竄匿秋高鷹隼費疑猜  
隔江空憶羅含宅得句先登鮑照臺  
辛苦一編難卒讀縱橫清淚滴殘杯

浙江樂清協副將世襲雲騎尉武進湯貞愍公江寧

殉難挽詞

堂堂忠孝裔一死繼前勲

入祖父均殉林爽文難

夢斷將軍樹

愁深

謙齋初集

五四

隱士雲虎兕藏舊印獅窟訪遺文

公有絕命詞

家國兩無憾聲

名天下聞

不知埋骨地雲樹望蒼茫  
野酌何人祭清琴遺恨長  
回思賭棋壘空說聚仙堂  
江上招魂遠臨風泣數行

上元王京洛茂才輓詞

王郎負豪氣貌似幽并兒  
廣眉更方頰磊落英雄姿  
發欠洞伏虎橫稍驚卧巖  
奈逢好文日顧盼空自竒  
放蕩吳越間旅食慚光輝  
蹭蹬返故里悲歌掩山扉  
寂寞冥肆荒宴違念妻孥  
飢妖氛熾江水慷慨登城  
陴振臂奮一呼頭斷心不  
移朝廷養士恩此身將何  
爲叱咤懾千人視死乃如  
歸



鍾山勢嵯峨再樹蔣侯碑

醉歌行

昨日落花今日塵攜糧負薪徒苦辛  
黃河難清馬難角富貴不來吾有身  
若待金盆始濯足垢污應同陰  
子春聽音飲酒須錢神賣褥不顧妻  
孥喚夏侯簾底女奴出公孫門內糟  
封新深盃急盞示真率傳旛播纛何紛  
綸曼聲大徧涼州徹雄竹半夜蒼龍震  
織兒寢櫃偏厭聞魁檉輓歌愁殺人

東阿周公挽詞

袞袞三軍淚長淮隕大星身猶關治亂死已報朝廷抗

謙齋初集

五五

疏情尤迫橫戈目未瞑此邦空屬望烽火逼郊坰公奉

九月十五日  
薨於王市集

肥水傳心學

公講學  
宗陽明

符離問字圍巖君趨馬帳小子仰龍

門記向春風別難乾老淚痕騎箕天上去珍重尺書存

十月十日奉檄赴東關夜泊巢湖

獨倚蓬窗首重搔霜林風葉雜蕭騷照殘清夢湖邊月振  
起雄心夜半濤磊塊儘澆千日酒功名難問萬人刀王師  
未報江南捷士卒宵征莫憚勞

湖干阻風

黑霧全湖暗朱風盡夜號荒雞催落月斷鴈下平臯艖小



身如縛衾寒夢不牢因悲諸戍卒猶未寄征袍

居巢懷古

蘆荻蕭蕭埜水平渡頭薄暮客愁生幾株衰柳迎官舫終  
古寒山繞縣城竊笑鴻門空碎斗願隨緱嶺學吹笙英雄  
事業神仙夢都付江湖日夜聲

濡須口號柬李少荃

偃月城邊故壘空當年春水走艨艟山川形勝猶如此醉  
倚篷窗話戰功

東關軍次張雨樵

印塘

廉訪招飲以述懷句見示

當筵空借箸辟地欲垂綸試問佳時策於今有幾人

謙齋初集

五六

夜泊居巢

老樹昏鴉啼破宇寒烟冷月暗荒城浮橋不鎖巢湖水臥  
聽孤篷盪槳聲

柘皋晤少荃留飲

狐狸嗥白晝燐火散荒祠亂後傷寥落生存嘆子遺瘡痍  
何日復撫卹有誰知握手談時事悲詞倒酒卮

癸丑十月二十四日募勇五百人赴北峽關越二日

次舒城東郊接朱卧雲

麟祺

刑部函單騎往商戰守

計黎明賊犯白沙嶺千總梅長青接戰比部督師合  
擊總兵恒興先遁軍遂潰比部陣亡日晡予勇至梅



心驛將前進前廉訪使張公熙宇止之列陣山谷以  
待恒興忽策馬北去揚言賊過小關軍益搖亂退屯  
七里河夜雨如注士卒飢寒有去志舒城教諭金效  
川上珍以白糜犒師余激以大義眾麤定二十九日  
味爽入舒城謁呂侍郎公偕徐鏡溪司馬徘徊庭中  
曰寇深矣無兵無餉吾意早決汝自爲之余力請回  
軍桃城撤浮橋號召鄉兵調援六安公不應淚下如  
雨給余令箭一枝余復之河干賊已紛紛薄岸俄而  
城陷火四起人聲沸騰轟傳呂侍郎投水死有一友  
一僕同遇難嗟呼死於兵死於水英靈毅魄蕩爲罡

謙齋初集

五七

風彼擁兵而逸獨何心哉爰作詩以紀之

夜過小關

角聲吹月墮空山馬踏寒雲夜度關舊是魏吳爭戰地據  
鞍高唱大刀環

雲峯山店酬金效川教諭餽酒

煙火雲峯晚楓林落日低巡山瘖虎過咏屋怪禽啼府帖  
勞官馬軍租哭寡妻故人情義重瓢榼遠提攜

七里河帳中作

馬蹶蹶踏輕冰裂石碎沙崩河水齧天低陣角壞雲沈凍  
雨濕衣身裹鐵宵寒鵝鶴寂無聲隔岸青烽倏明滅腰閒



閃閃電光掣寶刀忍饑愁飲血

哭朱卧雲刑部

朱六合人丁未進士刑部主事隨呂公勳辦團練

白晝妖氛慘青林戰氣昏捐軀完使節遺恨痛親門封翁尙存  
馬革拋黃土鵲聲化碧痕荒山風雨夜有客暗招魂

哭工部侍郎呂公鶴田

坐困危城寇已深從容談笑正衣襟全身尙可謀時事臨  
難先存授命心詎效匹夫矜小節更邀死友結知音六安徐丈

敬山通判同赴水

寒宵夢斷璇源館冷浸忠魂葬碧濤

輓張玉田廉訪

張名熙字巖眉人小派失守革職後棄集賢閣被逮畏罪自盡

攬鏡常悲白髮新餘生戎馬困烟塵曲端底事寃忠獻王

謙齋初集

五八

導何心負伯仁粵嶠曾編平虜策皖江幾見死綏人九原  
空灑秋風淚青史難明報國身

無錫汪芾亭

棠携詩卷月夜過訪小輞川

四壁烽烟警浮生空嘯歌夜眠梅樹下君向草堂過投我  
詩盈卷閒吟淚更多洗杯頻問月不醉更如何

詠梅

席帽緇衣澹戰塵歲寒孤負小園春梅花依舊垂垂發索  
笑渾如久別人

十一月十二日粵賊圍城撫軍江公甫抵廬率士民

固守夜賦



倉卒登陣日軍中有一韓片言先示義萬姓樂傳餐居送  
粥飯礮火轟雲熱霜輦門月寒書生輕殺賊倚劍仰天看

### 城上望月

四圍刁斗犯巖更涼月高懸夜氣清歲暮郊原烽火逼時  
艱骨月別離輕唱籌幸有三年粟草檄忙催五路兵軫念  
羣黎紆廟算江淮寇盜正縱橫

### 迢迢津夜坐

時春屬辟  
之派河

鼠睗殘燈暗烏啼夜色昏悲笳驚斷夢冷月憶荒村家室  
飄萍梗饑寒隱淚痕圍城音信絕何日話衡門

### 城南捷

十一月二十八  
日毀賊營三

### 謙齋初集

五九

陰陽薄旄頭落兵仗惡熊羆作毒焰燒空火箭著朔風捲  
地摧枯擗鋌不苟躍鬪體快斫鴉鵲無聲兔狐失穴城南  
大戰妖氛却爲語爾民休蹙額軍中下令無私掠明日登  
陣看殺賊

### 涼州部

陝督舒興阿擁  
兵駐剛子集

斗門夜鑿藏舟浦陰風慘淅沈桴鼓十丈雲梯縱火弩木

鳶飛調涼州部將軍死綏殊莽鹵總或玉山  
戰亡北郭京兆生存猶

媚嫵張果司印塘  
敗至店埠

百二秦關舊鎮撫營門終日閉司簿尚

鬼軍成焦土

川勇  
被劫

子弟兵爭築堵總戎音德布帶  
楚勇營西鄉鄉團四

散怯如鼠破產亡家遭禦瑜城內軍書空旁午旌旗在眼



人歡舞休歡舞而今那有合肥虎

廬城陷十二月十日

月光滅鼓聲絕霹靂半空天崩地裂斗城西北車徒結轡  
孽火飛騰鬼風陰黑刀聲哭聲爭競耆人人對面無顏色  
耶孃妻子尋不得盱眙塗地尸僵踏癸丑年乙丑月

城中晤桐城光進垣星階茂才道及馬丈沅伯瑞辰

郎中全家遇難命之出亡慘賦

短髮鬍鬚漬戰塵干戈影裏涕痕新逢君莫話當年事我  
亦烏衣巷口人

記得南山同射虎那知東海忽揚塵草閒偷灑英雄淚珍

謙齋初集

六十

重他年許國身

雪夜

歲月浮沈速滄桑感慨新壯懷銷涕淚往事雜酸辛患難  
仍餘我流離更有親遙憐風雪夜應憶未歸人

登城

城郭蕭條暮色侵不堪歲晚獨登臨南冠忍下羈囚淚東  
海終存烈士心生挾魚腸寒白日死沽駿骨賤黃金亦知  
親在身難捨被髮悲歌百感深

夜讀楚騷有感岷樵中丞

冷雨窮簷滴悲風入夜聞殘燈寒弔影斷雁慘離羣身辱



泥中絮心孤嶺上雲含愁讀瑤草無夢遇湘君

小除夕得家中書用唐人韻

不解羈情苦寒宵影自親欲眠疑見鬼苟活幸爲人烽燧  
連諸郡艱難試一身家書偷展讀愁裏又逢春

除夕至南村

豺狼窟裏生還日爆竹聲中夜到家繞室鄉鄰爭問訊未  
言涕淚已交加老親握手神魂定稚女牽衣笑語譁瓦竈  
茆簷風雪冷杯盤團聚剪燈花

謙齋初集



